

本

經

逢

原

本經逢原卷四

長洲石頑張

璐路玉父纂述

男

以柔安世

訥遜言

纂訂

蟲部

蜂蜜 甘平無毒入調補藥用白蜜。瀉火藥用赤蜜。味酸者不堪入藥。不可與生葱獨煮。萬苣同食令人下利。凡煉蜜炭火慢煉。掠去浮沫。至滴水成珠爲度。煉成每觔入陳酒四兩。再熬沸和藥爲丸。則藥力易

化

本經主心腹邪氣諸驚癇瘕安五藏補不足益氣補  
中止痛解毒除衆病和百藥久服強志輕身不饑不  
老

發明 蜂采無毒之花醞釀而成生則性涼清熱故  
能治心腹之邪氣熟則性溫補中安五藏諸不足  
而和平故能解毒柔而潤澤故能潤燥緩以去急故  
能主心腹肌肉瘡瘍之痛使暴治陽明結燥大便不  
通用蜜煎導法取其能通結燥而不傷腸胃也凡滋

補藥俱用煉白蜜丸。取其和脾潤肺也。赤蜜味酸。食之令人心煩。惟降火藥用之。白蜜雖補脾肺。然性涼潤脾胃。不實腎氣。虛滑及溼熱痰滯胸痞不寬者。咸須忌之。故瓊玉膏用糖霜。枳朮丸用荷葉裹飯。佐金丸用米飲。牛黃丸用蒸餅。黑錫丹用酒麴。慈珠丸用神麴。虎潛丸用酒香連。丸用醋茸。珠丹用紅棗。滾痰丸用水泛。各有所宜。今人修製丸劑。槩用蜂蜜。殊失先哲用方之義。

蜜蠟

淡平無毒。

本經主下痢膿血補中續絕傷金瘡益氣不饑耐老  
發明 蜜成於蠟萬物之至味莫甘於蜜莫淡於蠟  
得非厚此薄彼耶仲景治痢有調氣飲千金治痢有  
膠蠟湯蓋有見於本經之義也淡爲五味之本胃爲  
五藏之源故能補中續傷蓋有得於太極也甄權治  
孕婦胎動下血不絕欲死以雞子大一枚煎三五沸  
投美酒半升服立瘥又能解毒故蠟礬丸用之爲君  
華陀治下痢食入卽吐用白蠟方寸匙雞子黃一枚  
石蜜苦酒髮灰黃連末各半雞子殼先煎蜜蠟苦酒

雞子四味令勻乃納連末髮灰熬至可丸乃止二日服盡神効

露蜂房

苦鹹平有毒

本經主驚癇瘈瘲寒熱邪氣癰疾鬼精蠱毒腸痔火熬之良

發明 露蜂房陽明藥也本經治驚癇癰疾寒熱邪氣蠱毒腸痔以其能祛滌痰垢也瘡瘍齒痛及他病用之者皆取其以毒攻毒殺蟲之功耳

蠐螬

一名果贏  
細腰蜂也

辛平小毒

本經治久聾欬逆毒氣出刺出汗

發明 詩言螟蜂有子果羸負之言細腰之蜂取青蟲之子教祝變化成子也大明治嘔逆生研能罾竹木刺卽本經出刺出汗取其毒之銳以出其刺也

蟲白蠟

甘溫無毒

發明 蠟樹屬金性專收斂堅強之氣其葉能治瘡腫蟲食其葉而成與桑螵蛸無異爲外科之要藥取合歡皮同入長肉膏中神効今人治下疳服之未成卽消已成卽斂以半兩入鯽魚腹中煮食治腸紅神

効

紫釰

卽紫草茸

甘鹹平小毒。

發明 紫釰乃騏驎竭樹上蟻壤聚其脂液而成與蜂釀蜜無異。出真蠟爲上。波斯次之。古方治五藏邪氣。金瘡崩漏。破積血。生肌止痛。今人專治痘瘡。有活血起脹之功。無鹹寒作瀉之患。其功倍於紫草。故以紫草茸呼之。實非紫艸同類也。

五倍子

卽川文蛤

苦酸鹹平無毒。產川蜀如菱角者佳。

法釀過名百藥煎。每五倍末一觔。入桔梗甘草真茶。

各一兩爲末。入哮槽二兩。拌和置糠中。窰待起如發麪狀。卽成矣。作餅晒乾用。

發明 川文蛤善收頑痰。解熱毒。黃昏欬嗽。乃火氣浮於肺中。不宜用涼藥。宜五倍五味。斂而降之。若風寒外觸。暴嗽及肺火實盛者。禁用。以其專收而不能散也。故痰飲內盛者。誤用則聚斂於中。往往令人脹閉而死。爲末收脫肛及子腸墜下。○百藥煎性浮味帶餘甘。治上焦痰嗽。熱渴諸病。含嚥尤宜。煨過主下血。烏鬚髮消腫毒。欬金瘡。治喉痺口瘡。搽之便可進。

食也

桑螵蛸

甘鹹平無毒桑枝上螳螂子也火炙黃用。

本經主傷中疝瘕陰痿益精生子。女子月閉腰痛通五淋利小便水道。

發明

桑螵蛸肝腎命門藥也。功專收瀦。故男子虛損。

腎衰陽痿夢中失精遺溺白濁方多用之。本經又言通五淋利小便水道。蓋取以泄下焦虛滯也。桑螵蛸散治小便頻數如稠米泔。心神恍惚瘦悴食少得之。女勞者方用桑螵蛸。遠志龍骨菖蒲人參茯苓當歸。

龜甲各一兩。卧時人參湯調下二錢。如無桑樹上者。以他樹上者。濃煎桑白皮汁佐之。若陰虛多火。人誤用。反助虛陽。多致洩赤。莖痛強中失精。不可不知。生研爛塗之。出箭鏃。

雀甕

一名蜚蠊  
俗名戴毛

甘平小毒

本經主寒熱結氣。蠱毒鬼瘧。小兒驚癇。

發明 雀甕蜚蠊殼也。其蟲夏生葉上。背上有刺。螫人故名戴毛。秋深葉盡。欲老口吐白沫。凝聚漸硬。在中成蛹。如蠶至夏羽化而出。其形有似蜻蜓而翅黑。

稍潤放子葉上而生蛄蜥謂雀甕者以雀好食其蛹也入藥惟取石榴樹上者連蛹炙焙用之蘇頌曰今醫家治小兒驚癇用雀甕子連蟲同白礬蠶全歌各三枚微炒搗末煎麻黃湯調服一字日三服大效藏器治小兒撮口不得飲乳但先斄口傍見血以雀甕打破取汁塗之

原蠶蛾 鹹溫小毒取未交雄蛾紙封焙乾拌椒密藏則不蛀

本經主心腹邪氣起陰痿益精氣強志生子好顏色

補中輕身

發明 蠶之性稟淫火力專助陽其子在臘月中非以重鹽鹽透水漬曝乾則繭不能繅絲出子之後非桑不食本經主心腹邪氣皆桑之餘力猶蠶蠶之治風痰蠶繭之療癰腫蠶沙之去風溼耳其起陰痿益精氣強志生子卽別錄之益精氣強陰道交精不倦亦能止精若合符節好顏色令人而色好之互辭補中輕身者以其善補真陽陽主輕捷故也詳叅經旨洵爲原蠶主治無疑奈何集本草者悞列樗雞之下

敢力正之。

白殭蠶 鹹辛平無毒。色白者良。入藥惟取直者爲雄。去黑口及絲炒用。

本經主小兒驚癇夜啼。去三蟲。滅黑點。令人面色好。男子陰瘍病。

發明 殭蠶蠶之病風者也。功專祛風化痰。得乎桑之力也。本經治驚癇。取其散風痰之力也。去三蟲。滅黑點。男子陰瘍。取其滌除浸淫之淫。三蟲亦淫熱之蟲也。凡咽喉腫痛及喉痺。用此下咽立愈。其治風痰。

結核頭風皮膚風疹丹毒作癢疳蝕金瘡疔腫風疾  
皆取散結化痰之義

蠶繭

甘溫無毒

發明 蠶繭治癰腫無頭燒灰酒服次日卽破煮湯

治消渴繚絲湯及絲綿煮汁功用相同

蠶退

卽馬明退

甘平無毒卽老蠶眠起所蛻皮入藥微

炒用今以出過蠶之紙爲馬明退非也

發明 蠶非桑葉不生得東方木氣之全故能治風

病血病而蛻治目中翳障較之蟬蛻更捷惜乎一時

難覓。

蠶沙

甘辛溫無毒。微炒用。

發明

蠶沙療風溼之專藥。有人病風痺。用此焙熟。

絹包熨之。治爛弦風眼。以麻油浸蠶沙二三宿。研細塗患處。過宿卽愈。蠶沙置酒罈上。泥好。色清味美。然惟晚者爲良。早蠶者不堪入藥。以飼時火烘。故有毒也。

九香蟲

鹹溫無毒。

發明

九香蟲產貴州。治膈腕滯氣。脾腎虧損。壯元

陽攝生方烏龍丸用之。

雪蠶

即雪蛆

甘寒無毒。

發明 雪蛆生蛾眉山北積雪歷年不消其中生此大如瓠味極甘美故能解內熱渴疾方物中之最益人者也。

蜻蛉

一名蜻蛉

赤者名赤卒

微寒無毒。

發明 蜻蛉生水中而能煖水藏強陰蓄精而赤者性猶壯熱助陽藥用之。

樗雞

即紅娘子

苦平有毒不可近目去翅足同糯米炒。

去米用

發明 樗雞厥陰經藥也能活血散血治目翳撥雲  
膏中與芫青斑蝥同用亦是活血散結之義能通血  
閉行瘀血主瘰癧辟邪氣療猘犬傷治偏頭風用紅  
娘子青娘子各七枚去翅足炒爲末同葱莖搗塗痛  
處周時起泡去之孫一奎治血蠱用抵當丸以樗雞  
易水蛭三服血下脹消形神自復與薛新甫治水腫  
椒仁丸中芫青不殊一走血而下瘀一走氣而破水  
皆峻劑也綱目以本經原蠶蛾主治誤列於此今正

之。

芫青

卽青娘了

辛溫有毒。去翅足同糯米炒。去米用。

發明

芫青居芫花上而色青。故能泄毒。攻積破血。

墮胎功同斑蝥。而毒尤猛。芫花有毒。故也。其治瘋犬。

傷。消目。腎。刮偏頭風。塞耳聾。皆取其毒。銳也。又治月。

閉。水腫。椒仁丸方用之。

斑蝥

辛鹹溫有毒。去翅足同糯米炒熟。或醋煮用。

本經主寒熱鬼疰。蟲毒鼠瘻。瘡疽蝕死肌。破石癰。

發明

斑蝥人獲得時。尾後惡氣射出。臭不可聞。其。

性專走下竅利小便故本經言破石癰能攻實結而  
不能治虛秘不過引藥行氣以毒攻毒而已但毒行  
小便必瀉痛當以木通滑石導之其性猛毒力能墮  
胎虛者禁用瘋犬傷先於患人頭上拔去血髮二三  
莖以斑蝥七枚去翅足炙黃同蟾蜍搗汁服之瘡口  
於無風處搨去惡血小便洗淨髮灰敷之服後小便  
當有瘀毒泄出三四日後當有肉狗形三四十枚爲  
盡如數少再服七枚若早服雖無狗形永不發也  
葛上亭長辛溫有毒去翅足同糯米炒去米用

發明 亭長大毒。善通淋。及婦人經脈不通。以五枚研末服三分。空心甘草湯下。須臾臍腹急痛。以黑豆煎湯服之。卽通。此蟲五六月爲亭長。頭赤身黑。七月斑蝥九月爲地膽。隨時變化。其毒可知。

地膽 辛溫有毒。同糯米炒去米用。

本經主鬼疰寒熱鼠瘦惡瘡死肌破癥瘕墮胎。

發明 地膽有毒而能攻毒。性專破結墮胎。又能除鼻中癰肉。下石淋。功同斑蝥。力能上涌下泄。

蜘蛛

微寒有毒。其種類不一。惟用懸網者入藥。

發明 仲景治陰狐疝氣。偏有大小。時時上下者。蜘蛛散主之。以其入肝。性善循絲。上下故取。以治舉凡上下之病。別錄治大人小兒癰疔。又治乾霍亂服之。能令人利。其邪得以下泄也。搗汁塗蛇傷。効。壁錢 無毒。

發明 生壁間似蜘蛛而形扁。其膜色白如錢。故名。治鼻衄及金瘡出血不止。取蟲汁注鼻中。及點瘡上。同人中白等分。燒研治疳。又治喉痺。

蠟 辛平有毒。被蚤者以木梳合之。卽愈。去毒及足。

用亦有獨用其尾者其功尤捷。滾醋泡去鹹炒乾用。  
發明 蠟產於東方。色青屬木。治厥陰諸風掉眩及  
小兒胎驚發搐。最爲要藥。左半身不遂。口眼喎斜。語  
言蹇澀。手足抽掣。癱疾寒熱。耳聾無聞。疝氣帶下。無  
不用之。蠟尾膏治胎驚發搐。用蠟梢二十一枚。麝香  
少許。屢効。東垣治月事不調。寒熱帶下。有丁香柴胡  
湯。方用羌活柴胡。當歸生地。丁香全蠟。蓋取以散血  
分之風熱耳。

水蛭 鹹苦平有毒。水蛭是小長色黃。挑之易斷者。

勿誤用泥蛭頭。同身潤者服之。令人眼中如生烟。漸至枯損。凡用水蛭。曝乾。豬油熬黑。令研極細。倘灸不透。雖爲末。經年得水。猶活。入腹尚能復生。凡用須預先熬黑。以少許置水中。七日內不活者。方可用之。本經逐惡血瘀血。月閉。破血。瘕積聚。無子。利水道。發明。鹹走血。苦勝血。水蛭之鹹。苦以除畜血。乃肝經血分藥。故能通肝經聚血。攻一切惡血。堅積。本經言無子。是言因血瘕積聚而無子也。別錄云。墮胎性劣。可知。昔人飲水。誤食水蛭。腹痛而黃。飲泥漿水數

碗乃得下。蓋蛭性喜泥。得土氣隨出。或用牛羊熱血。同豬脂飲亦下。或以梅漿水多飲。則蛭溶化而出也。蛆苦寒無毒。漂淨炙黃。搗細末。同糖霜食之。發明。蛆出糞中。故能消積。治小兒諸疳積滯。取消積而不傷正氣也。一法用大蝦蟆十數隻。打死置罈內。取糞蛆不拘多少。河水漬養三五日。以食盡蝦蟆爲度。用蘇布紮住罈口。倒懸活水中。令污穢淨。取新瓦燒紅。置蛆於上焙乾。治小兒疳積腹大脚弱。腎膜遮睛。每服一二錢。量兒大小服之。無不驗者。勿以其

鄙而忽諸。

狗蠅 鹹溫無毒。

發明 蠅食狗血性熱而銳力能拔毒外出故治痘瘡倒靨色黑脣口冰冷之證以數枚搗細醅酒少許調服聞人規方也。

蟬蛸 鹹微溫有毒。

本經主惡血血瘀痺氣破折血在脇下堅滿通月閉目中淫膚青腎白膜。

發明 蟬蛸穴土而居與蚯蚓不異故本經所治皆

瘀血之證。金匱治虛勞瘀血。大黃廩蟲丸方用之。取其去脇下堅滿也。許學士治筋急養血地黃丸中用之。亦取其治血瘀也。取汁滴目去翳障。散血止痛。千金研末敷小兒臍瘡。加豬脂調治小兒瘡。經驗方治瘀傷腫痛。肘後搗塗竹木刺。蘇頌搗汁點喉痺。得下卽開藏器塗遊風丹疹。又治麥芒入眼。以蠐螬在日上隔布摩之。芒著布上卽出。

**桑蠹蟲**

甘溫。小毒。色白帶黃。而腹中無穢。按之無水者爲真。若頭硬而腹中不淨者。卽雜樹內蠹也。如

一時難覓真者則以栽毛殼煨灰存性代之

發明 桑蠹蟲食木柔能勝堅故治痘瘡毒盛白陷不能起發者用以絞汁和白酒釀服之即起但皮薄脚散及泄瀉畏食者服之每枚駁裂而成不救不可不慎千金治崩中漏下赤白桑蠹燒灰溫酒服亦治胎漏下血効

桃蠹蟲

辛溫無毒

本經殺鬼邪惡不祥

發明 桃實中蟲食之令人美顏色與桃蠹不異其

蟲屎能辟溫疫令不相染爲末水服方寸匕

蚱蟬

鹹甘寒無毒

本經主小兒驚癇夜啼癰病寒熱

發明 蟬主產難下胎衣取其能蛻之義聖惠治小

兒發相有蚱蟬湯散丸等方今人只知用蛻而不知用蟬也

蟬蛻 鹹甘寒無毒去翅足用

發明 蟬蛻去腎膜取其蛻義也治皮膚瘡瘍風熱破傷風者炒研一錢酒服神効痘後目腎年肝湯服

一錢則腎漸退。更主痘瘡發癢。若氣虛發癢。又當禁服。小兒夜啼。取蟬蛻四十九枚。去前截。用後截。爲末。分四服。鈎藤湯服之。卽止驚啼。加硃砂二字。若用上截。卽復啼也。小兒驚癇。夜啼。癇病寒熱。並用蟬腹。取其利竅通聲。去風豁痰之義。較蛻更捷。

蛻螂 鹹寒有毒。去足火。灸用。勿置水中。令人吐。本經主小兒驚癇。瘕瘕。腹脹寒熱。大人癲疾。狂瘍。發明 蛻螂手足陽明足厥陰藥也。本經等治。總不離三經之證。其治暴噎吐食。用二枚。入生薑內煨。以

陳橘皮二錢。同巴豆炒過去。巴豆將蜣螂陳皮爲末。每服二分。吹入喉中。吐痰二三次。卽愈。又治箭鏃入骨。用巴豆微炒。同蜣螂搗塗。痛定必癢。忍之待極癢。不可忍。乃撼動。拔之。又燒灰入冰片少許。治大腸脫肛。摻上。托入。搗丸塞下部。引痔蟲出。盡永瘥。其蜣螂心貼疔瘡。拔疔貼半日許。血盡根出。則愈。然蜣螂最畏羊肉。食之卽發。

天牛

甘溫小毒

發明

天牛乃木中蠹蟲所化。楊樹中最多。桑樹中

獨勝長鬚如角。故有天牛之名。利齒善嚙。是有嚙桑之號。其性最銳。取治疔腫惡瘡。出箭鏃竹木刺。最捷。與螻蛄不殊。一嚙木而飛。一穴土而出。其類脫之性。則一如無嚙。桑他樹上者。亦可焙乾爲末。蜜調傅之。螻蛄 鹹寒。小毒。去翅足炒用。

本經主產難出肉中刺。去潰腫下噎。噎解毒除惡瘡。發明 螻蛄性善穴土。故能治水腫。自腰以前甚。瀉能止大小便。自腰以後甚。利能通大小便。取以治水最効。但其性急。虛人戒之。本經治難產者。取其下半。

煮湯服之則下也。出肉刺潰癰腫惡瘡者。生搗塗之。  
肉刺卽出瘡腫卽潰也。下噎噎者。炙末吹之。噎噎卽  
下。非噎膈之謂也。千金治箭鏃入肉。以螻蛄柝汁滴  
上三五度。自出。延年方治胎衣不下。以螻蛄一枚。水  
煮數沸。灌下入喉。卽出。小兒臍風。螻蛄甘草等分。爲  
末敷之。効。

螢火

卽熠耀本  
經名夜光

辛溫無毒

本經明目

發明 螢火。小腐草所化。得大火之餘氣而成。入胞

絡三焦。能辟邪明目。取其照幽夜明之義。務成子螢火丸。辟五兵白刃。虎狼蛇虺之毒。惡鬼疫癘之邪。龐安常亦極言其効。惜乎世鮮備用。

衣魚

卽蠹魚

鹹溫無毒。卽衣帛書畫中之蠹。碎之如

銀有粉者是。

本經主婦人疝瘕。小便不利。小兒中風。項強背起。摩之。

發明 衣魚主中風項強。摩之卽安。驚癇天弔口喎。淋閉服之卽愈。皆手足太陽經病。乃神農本經之藥。

古方盛用今人罕知合鷹屎白殭蠶敷瘡癰滅

鼠婦

本經名蚺蟻  
即濕生蟲

酸鹹無毒

發明

金匱治久瘧鼈甲煎丸中用之以其主寒熱

去瘀積也古方治驚癇血病多用之厥陰血分藥也

千金治產婦遺尿以鼠婦七枚熬研溫酒服之痘瘡

倒靨為末酒服一字即起又解射干蜘蛛毒

蠱蟲

本經名  
地鱉

鹹寒有毒或去足炒用或酒醉死去

足搗汁用

本經主心腹寒熱酒洒血積癥瘕破堅下血閉

發明 麤蟲伏土而善攻隙穴傷之不死與陵鯉不  
殊故能和傷損散陽明積血本經治心腹寒熱洒洒  
亦是積血所致金匱大黃麤蟲丸用水蛭麤蟲取其  
破堅癥下積血耳無實結者勿用跌撲重傷焙乾爲  
末酒服二錢接骨神効。

蠱蟲

卽蜚蠊

苦微寒有毒卽噉牛血蠅去翅足炒用。

本經逐瘀血破血積堅痞癥瘕寒熱通利血脈九竅  
發明 蟲食血而治血因其性而爲用肝經血分藥  
也本經治癥瘕寒熱是因癥瘕而發寒熱與蜣螂治

腹脹寒熱不殊。仲景抵當湯丸。水蛭蟲雖當並用。二物之純險懸殊。其治經閉。用四物加蜚蠊作丸服。甚良。以破瘀而不傷血也。苦走血。血結不行者。以苦攻之。其性雖緩。亦能墮胎。

蟾蜍。皮辛涼微毒。肉甘平無毒。捕取風乾。泥固煨存性用。其目赤嘴赤者有毒。一種色青而生陂澤中者曰鼃。與此不同。

發明。蟾蜍土之精也。習土遁者賴之。其形大而背多疣磊者。是土性厚重。其行極遲。土生萬物亦能化。

萬物之毒故取以殺疔積治鼠痿陰蝕疽癰燒灰傳惡瘡並効弘景治溫病發斑困篤用以去腸生搗一二枚啜其汁無不瘥者治獐犬傷先於頂心拔去血髮三四莖卽以蟾蜍一二枚搗汁生食小便內見沫其毒卽解又破傷風用二枚生切如泥入椒一兩同酒炒熱入酒二盞乘熱飲之少頃通身汗出而愈發背疔腫初起以活蟾一隻繫定放腫上半日蟾必昏憤卽放水中以救其命再換一隻如前蟾必踉蹌再易一枚其蟾如舊則毒散矣其金蟾丸治腫脹腹滿

并治小兒疳勞。腹大脰細。方用大蟾一隻。以砂仁入腹。令滿鹽泥。固濟。煨存性。黑糖調服。一二錢。七下盡。青黃積糞。卽愈。未盡。過二三日再服。以腹減熱除爲度。若糞不能濺注。而滴淋不前者。此元氣告匱。不可救也。

蟾酥

辛溫有毒。

發明 蟾酥辛溫。其性最烈。凡用不過一分。齒縫出血。及牙疼。以紙絛少許。燃之。卽止。蟾酥丸治發背疔。腫一切惡瘡。拔取疔毒最捷。入外科有奪命之功。然

輕用能爛人肉。

蟹蟄 甘寒小毒。

本經主邪氣破癥堅癰腫陰瘡服之不患熱病。  
發明 蟾蜍蟹蟄同類異種故其功用亦不甚相遠。  
服之不患熱病卽弘景治溫病發斑困篤之意時珍  
言古方多用蟹蟄近方多用蟾蜍蓋古人通稱蟾爲  
蟹蟄而蟹蟄不復入藥矣。

鼃俗作蛙 甘寒無毒。

發明 時珍曰鼃產於水與螺蚌同性故能解熱毒。

利水氣。但係溼生之物。其骨性復熱。食之小便苦淋。  
妊娠食蛙。令子壽夭。小蛙多食。令人尿閉。臍下酸痛。  
捕車前水飲之。可解。戴厚禮云。凡渾身水腫。或單腹  
脹者。以青蛙一二枚。去皮炙熟食之。則自消也。嘉謨  
曰。時行而赤項腫。名蠶墓瘟。以金線鼃搗汁水調空  
腹頓飲。極効。

蝌斗

發明 蝌斗生水。中蠶墓子也。有尾如魚。漸大則脚  
生。尾脫。因其所稟之毒未化。故藏器取治火魘熱毒。

及腫瘍瘡。並搗碎傅之。或化水塗之。或配入敷藥中。竝効。又得効方。多用蛭斗陰乾。待桑椹熟。等分置瓶中。密封懸屋東。或搗汁浸埋東壁下。百日化泥。取塗鬚髮。永黑如漆。

蜈蚣 辛溫有毒。火炙去足用。

本經主鬼疰蠱毒。噉諸蛇蟲魚毒。殺鬼物。老精除溫瘧。去三蟲。

發明 蓋行而疾者。惟風與蛇。蜈蚣能制蛇。故亦能截風厥陰經藥也。嶺南有蛇瘴。項大腫痛連喉。用赤

足蜈蚣二節。研細水下卽愈。又破傷風欲死。研末擦牙邊。去涎沫立瘥。本經言噉諸蛇蟲魚毒。悉能解之。萬金散治小兒急驚。蜈蚣一條。去足炙黃。入硃砂輕粉。乳汁爲丸。服少許卽安。雙金散治小兒天弔。目久不下。口噤反張。蜈蚣一條。酥炙去頭足。入麝香爲末。以少許吹鼻。至眼合乃止。若眼未下。再吹之。小兒撮口。刮破舌瘡。蜈蚣末敷之。千金治射工毒瘡。蜈蚣炙黃爲末。敷之。小兒禿瘡。蜈蚣浸油搽之。直指方治痔瘡疼痛。蜈蚣炙末。入片腦少許。唾調敷之。急救方治。

溫瘡酒。酒時驚。涼隔散。加蜈蚣。蠍尾。服之。摘要治婦人趾瘡。甲內雞眼。及惡肉突出。蜈蚣一條。去頭足。焙研入麝香少許。去硬蓋。攤烏金紙。留孔貼上。一夕卽効。如有惡肉。外以南星末。醋和傅。四圍其祛毒之功。無出其右。

蚯蚓

卽地龍

鹹寒。小毒。白頸者良。解熱毒。入鹽化水。用通經絡。炙乾用。

本經主蛇瘕。去三蟲。伏尸。鬼疰。蠱毒。殺長蟲。

發明 蚯蚓在物。應土德。在星爲軫水。體雖卑伏。而

性善穴竄。專殺蛇蠱三蟲。伏尸諸毒。解濕熱。療黃疸。利小便。通經絡。故活絡丸以之爲君。地龍湯治痘瘡。脾腎虛熱。嬌紅五六日漸變乾紫。伏陷者。同葶藶和酒釀服之。卽起。若乾紫色黯皮堅。爲肝脾血熱。卽宜犀角。紫草。黃連。清解。非地龍所宜。溫病大熱狂妄。天行大熱。和人尿搗絞服之。熱毒從小便而去也。小便暴秘不通。亦宜用之。入葱化爲水。療暴聾。

蝸牛 鹹寒小毒

發明 蝸牛生下溼地。陰雨卽出。至陰類也。治

諸腫毒痔漏制蜈蚣蠟黃諸毒研爛塗之取其解熱  
消毒之功耳其形尖小而緣桑上者謂之緣桑蠶治  
大腸脫肛和豬脂塗之立縮此蠶諸木上皆有獨取  
桑上者正如桑螵蛸之義

龍蛇部

龍骨 甘平無毒粘舌色白者良煨赤水飛用飛之  
不細粘著腸胃令人寒熱

本經主心腹鬼疰精物老魅欬逆泄痢膿血女子漏  
下瘕瘕堅結小兒熱氣驚癇

發明 瀉可以去脫。龍骨入肝。斂。斂。收。斂。浮越之氣。本經主心腹鬼疰。精魅諸疾。以其神靈能辟惡氣也。其治欬逆泄利膿血。女子漏下。取瀉以固上下氣血也。其性雖瀉而能入肝。破結癥瘕堅結。皆肝經之血積也。小兒熱氣驚癇。亦肝經之病。得牛黃以協濟之。其祛邪伐肝之力尤捷。許洪云。牛黃惡龍骨。而龍骨得牛黃更良。有以制伏之也。其性收陽中之陰。喘走足厥陰經。兼入手足少陰。治夜夢鬼交。多夢紛紜。多寐泄精。衄血吐血。胎漏腸風。益腎鎮心。爲收斂精氣要藥。

有客邪則兼表藥用之。故仲景治太陽證火劫亡陽驚狂有救逆湯。火逆下之因燒針煩躁有桂枝甘草龍骨牡蠣湯。少陽病誤下驚煩有柴胡龍骨牡蠣湯。金匱治虛勞失精有桂枝加龍骨牡蠣湯。千金方同遠志酒服治健忘心忪以二味蜜丸硃砂爲衣治勞心夢泄。梅師同桑螵蛸爲末鹽湯服二錢治遺尿淋瀝。又主帶脈爲病故崩帶不止腹滿腰溶溶若坐水中止瀉藥中加用之止陰瘡收溼氣治休息痢久痢脫肛生肌斂瘡皆用之。但收瀉太過非久痢虛脫者。

切勿妄投火盛夫精者誤用多致溺赤瀉痛精愈不能收攝矣

龍齒 漚平無毒煨赤醋淬七次水飛用形如筆架重數兩外光澤如瓷碎之其理如石內如龍骨舐之粘舌者真亦有微黑而煨之色如翡翠者爲蒼龍齒較白者更勝其小如笋尖或如指狀者海鰈齒及骨也叢生如貫衆根者海馬齒也舐之亦能粘舌世多以等類僞充不可不辯

本經主殺精物大人驚癇諸瘕癰疾狂走心下結氣

不能喘息小兒五驚十二癇

發明 龍者東方之神故骨與齒皆主肝病許叔微云肝藏魂能變化故遊魂不定者治之以龍齒古方有遠志丸龍齒清魂散平補鎮心丸皆收攝肝氣之劑也又龍骨以白者爲上取固土氣以攝下脫齒以蒼者爲優生則微黑煨之翡翠可愛較白者功用更捷產後血暈爲要藥取其直入肝藏也予聞神龍蛻骨之說初未之信及從藥肆選覓龍齒見其骨有變化未全者半與牛骨無異始知宇宙之大無所不有

卽如蛇蟲之屬皆能蛻形化體豈特雲龍風虎而已哉龍稟東方純陽之氣故能興雲致雨東方木氣主乎生也其耳獨不可聽者陽神別走於角也春夏發現而秋冬潛伏者隨陽氣之鼓舞也虎稟西方陰暴之性故嘯則生風西方金令主乎殺也其項獨不能仰者陰威併振於尾也書潛伏而宵奮迅者乘陰氣之暴虐也以是推之則虎骨能搜風氣健筋骨療疼重睛能定人魄魄者陰之精也龍骨能蓄精氣收神識止滑脫齒能清人魂魄者陽之神也然龍性飛騰

而骨獨粘者正以其滯而欲蛻之始得飛冲御天。非  
飛冲後而蛻其骨也。觀本經驚癇癰疾結氣甄權鎮  
心安寃鬼等治總皆入肝。歛寃用以療陽神之脫同  
氣相求之妙。許叔微云肝藏寃能變化故寃遊不定  
者治之以龍齒。時珍曰龍者東方之神故其骨與齒  
皆主肝病。

龍角 甘平無毒。

發明 龍稟東方木氣而角又督脈所發故治驚癇  
瘈瘲神寃不寧龍火上逆身熱如火及邪魅不詳深

師五邪丸用之。而千金治心病有齒角同用者。

鼈甲

本經名  
鼈魚

酸微溫小毒。

本經治心腹癥瘕。伏堅積聚寒熱。女子小腹陰中相引痛。崩中下血五色。及瘡疥死肌。

發明 本經鼈甲所主之證。多屬厥陰。其功在平肝。木治血殺蟲。與鼈相類。亦能治陰瘡。千金有鮑甲煎。今藥肆多懸之。云能辟蠱。亦殺蟲之意。

陵鯉甲

俗名穿  
山甲

鹹微寒小毒。或酥炙。或黃土。或蛤

粉炒。發鬆研用。尾甲更勝。

發明 穿山甲入厥陰陽明及陰陽二蹻通經下乳  
瘡疾癰腫發痘爲要藥。蓋其穴出而居。寓水而食出  
陰入陽。能竄經絡。達於病所。凡風溼冷痺之證。因水  
溼所致。渾身上下。強直不能屈伸。痛不可忍者。於五  
積散內加穿山甲七片。全蠍炒十個。葱薑水煎熱服。  
取汗避風甚良。癰疽潰後不宜服。

石龍子 鹹溫小毒。綱目作鹹寒。誤。產平陽山谷。荆  
襄等處。其類有四。一種生岩石間。頭扁身長。尾與身  
等長七八寸。大者尺餘。其狀若蛇。而脚似梅花。鱗目

五色者爲雄。色黃身短者爲雌。此物最惜鱗甲。故見人不動。捕之亦不螫人。以其生岩石間。故本經謂之石龍子。以其善於變易。吞霧吐雹。有陰陽析易之義。故字林謂之蜥蜴。楚人名爲蝮蝮。實一物也。入藥。雌雄並用。去頭足。酒浸酥炙用之。入傳屍藥。醋炙用之。一種生草澤間。頭大尾短。身粗。其色青黃。有傷則啣草白敷。故謂之蛇醫母。能入水與石斑魚合。故又名水蜥蜴。不入藥用。一種生人家屋壁。形小。身細。長三四寸。色褐斑黑者。謂之蜾蜬。吳俗名爲壁虎。以其居

壁而善捕蠍蠅也。或云飼之以朱點。宮娥臂故名。守宮一種似守宮而頭圓身細長五六寸。色白如銀。通身細鱗。雌雄上下相應而鳴。情恰乃交者。蛤蚧也。荆襄嶺澤皆有。而西川產者最勝。捕得成對。線纏炙乾。捲榕樹皮中者是也。以此明辨方無悞用之失。

發明 石龍子爲本經中品。而綱目主治中有別錄。而無本經。豈本經之文有所殘缺歟。抑本經之文誤註別錄歟。其治五癰邪結氣利小便水道。破石淋下血者。以蜥蜴能吐雹祈雨。故治癰淋利水道。是其本。

性千金治癥結水腫屍症留飲有蜥蜴丸外臺治陰  
瘡方用之皆取其長於利水道耳按蜥蜴卽是石龍  
今房術藥中用之以其興發助陽而無止瀉之患也

守宮

一名蠪蜥  
俗名壁虎

鹹寒小毒

發明 守宮食蠪蜥蠪蜥乃治風要藥詳守宮所治  
風症驚癇諸病猶蜈蚣之性能透經絡也且入血分  
故又治血病瘡瘍以毒攻毒皆取其尾善動之義麻  
城移痘方治痘出眼目及正面稠密用以移痘於不  
傷命處其効最捷觀術士以守宮尾杵爲細末彈熟

肉上其肉便翕翕蠕動。移痘方得。非從此悟出。陶弘景云。蝦蟇喜緣籬壁間。以硃飼之。滿三觔。殺乾末。以塗婦人臂。有交接事。便脫。故名守宮。蘇恭曰。飼硃點婦人臂。謬說也。張華言。必別有術。今不傳矣。時珍曰。守宮祛風。石龍利水。功用自別。不可不知。

蛤蚧 甘鹹溫小毒。生嶺南城垣榕樹間。及粵西橫州等處者。長七八寸。蜀中產者。不過五寸。頭圓肉滿。鱗小而厚。形似守宮。鳴則上下相呼。雌雄相應。情洽乃交。兩相抱負。自墮於地。人往捕之。亦不知覺。以手

劈之至死不開。取以曝乾。爲房中要藥。卽尋常捕得者。功用亦相髣髴。但驗其圓圖成對。捲榕樹皮中者。卽真無疑。入藥去頭留尾。酥炙用之。口含少許。疾走不喘者。是其益氣之驗也。

發明 蛤蚧味鹹歸腎經。性溫助命門。色白補肺氣。功兼人參羊肉之用。而治虛損痿弱。消渴喘嗽。肺痿吐沫等證。專取交合腎肺之氣。無以逾之。愚按蛤蚧龍子。性皆溫補助陽。而舉世藥肆中。皆混稱不分。醫者亦不辨混用。龍子則剖開如皮。身多赤斑。偏助壯

火陽事不振者宜之。蛤蚧則羅束成對。通身白鱗。專溫肺氣。氣虛喘乏者宜之。虛則補其母也。

蛇蛻 鹹甘平。小毒。火熬用之。

本經主小兒二十種驚癇。蛇癇。癲疾。瘕瘕。弄舌。搥頭。寒熱。腸痔。蠱毒。

發明 蛇蛻屬巽走肝。故本經治小兒驚癇等病。一皆風毒襲於經中之象。其入藥有四義。一能辟惡。取其性靈也。故治邪辟鬼魅。蠱瘕諸疾。二能驅風。取其性竄也。故治驚癇癱駢。偏正頭風。喉舌諸疾。三能殺

蟲故治惡瘡痔漏。疥癬諸疾。用其毒也。四有蛻義。故治眼目醫膜胎衣不下。皮膚之疾。會意以從其類也。

蚺蛇膽

卽南蛇

甘苦寒小毒

發明 蚺蛇產嶺南。稟已土之氣。其膽受甲乙風木。其味苦中有甘。所主皆厥陰太陰之病。其治心腹蠱痛者。蟲在內攻嚙也。下部蠱瘡者。蟲在外侵蝕也。溼熱則生蟲。燥溼則殺蟲。內外施之。皆可取用。更能散腫消血。故直諫之臣。受廷杖者。臨時服少許。則血不凝滯於內。又能明目涼血。除疳殺蟲。惜乎難得真者。

白花蛇 甘鹹溫有毒產浙州者良禁犯鐵凡用去  
頭尾酒浸酥炙炭火緩焙去盡皮骨此物甚毒不可  
不防脇有方勝尾上有拂者真

發明 蛇性竄能引藥至於風痰處故能治一切風  
病其風善行數變蛇亦善行數蛻所以能透骨搜風  
爲大風白癩風風痺驚搐癰癰惡瘡要藥取其內走  
藏府外徹皮膚無處不到也陰虛血少內熱生風者  
非其所宜凡服蛇酒藥切忌見風開鐔時須避其氣  
免致面目浮腫凡癰風曾服過大楓子仁者服白花

蛇無効

烏梢蛇

甘平無毒。劍脊細尾者佳。忌犯鐵器。

發明

蛇性主風。而黑色屬水。故治諸風頑痺。皮膚

不仁。

風瘙癢疹。疥癬熱毒。眉鬚脫落。癰癢等瘡。但白

花蛇主肺藏之風。爲白癰風之專藥。烏蛇主腎藏之

風。爲紫雲風之專藥。兩者主治懸殊。而烏蛇則性善

無毒耳。

蝮蛇

肉大熱。膽微寒。並有毒。

發明

諸蛇皆是卵生。惟蝮蛇破母腹出。惡毒尤烈。

故以蝮名。其狀較諸蛇迥異。形短而粗。嘴尖鼻反。故  
又名反鼻蛇。有頭斑。身赤如錦紋者。有黃黑青黑而  
斑白者。皆蝮蛇也。有頭扁與土同色而無紋者。土虺  
也。亦名曰蜎。字形相類之誤也。時珍曰。蝮大虺小。其  
毒則一。抱朴子言。蛇類最多。惟虺中人甚急。卽時以  
刀割去瘡肉。投之於地。其熱如炙。須臾毒盡。人乃得活。  
一種形如蜥蜴。長一二尺者。千歲蝮也。年久脚生。能  
跳上樹。嚙人。嚙已還樹。垂頭聽人哭聲。頭尾相類。大  
如搗衣杵。俗名望板。歸言被其嚙必死。專望板歸以。

備殮具也。蘇頌以細辛雄黃等分爲末內瘡口中日  
易三四次。又以栝蒌根桂末著管中密塞勿令走氣。  
佩之中其毒者急救之。野談翁方急以黃荊葉搗爛  
敷之上皆解救之法。然有用其毒以攻疾厄之毒者。  
別錄取蝮蛇肉釀酒以療癩疾。蝮蛇膽磨汁以塗馬  
瘡。總取殺蟲攻毒之用耳。竊謂攻毒急救之藥頗多  
矣。必藉此而爲異端之術哉。姑存以備解救之法可  
也。

## 魚部

鯉魚 甘平無毒。其目能疑動者有毒。藥中有天門冬者勿犯。天行病後勿食。

發明 魚性逆水而上。動關翹尾。其力最勞。且目不夜瞑。故釋氏雕木象形以警世之昏惰者。鯉性跳躍急流。故取以治水腫之病。河間云。鯉之治水。驚之利水。因其氣相感也。黃痺脚氣溼熱孕婦身腫宜之。便血同白蠟煮食。腦髓治耳卒聾。齒治石淋。膽治目赤腫痛。取汁點之。鱗治產婦滯血。燒灰治吐血崩中。十灰散中用之。

鯪魚

本名鯪魚  
鯪音渾

甘溫無毒

發明 鯪魚多蓄池中。飼草而長。與青鱧混雜。故名曰鯪。江湖亦皆有之。食品之長味也。時珍言暖中和胃。此指池中蓄者而言。李廷飛言能發諸瘡。此指湖中獲者而言。各有至理。膽味苦寒。能出一切竹木刺在喉中。以酒化二三枚溫呷取吐。卽出。

青魚

肉甘平。膽苦寒。無毒。

發明 東方色青。入通於肝。開竅於目。故膽有點目治。靨之功。肉有補肝。逐水之用。同茱白煮食。治脚氣。

疼腫目睛生汁注眼能黑夜視物以其好噉螺蜆螺  
蜆能明目也乾青魚膽水磨點瘰癧痔瘡與熊膽同  
功

鯁魚

本名鯁魚

甘溫無毒

發明 池魚大都無毒兼此魚恆食諸魚之遺其毒  
雖少不無助長溼熱之虞有皂白二種皂者頭大白  
者腹腴雖食品之下而有溫中益氣之功與鯽魚無  
異也

潤口魚

本名鯽魚

甘溫無毒

發明 鮓生海中。與石首同類。以之剖腹曝乾。亦與石首作鮓無異。以其領下有骨撐開。故有濶之稱。能開胃進食。下膀胱水氣。病人食之。無發毒之慮。食品中之有益者也。

鰻魚

古名鰻魚

甘溫無毒。

發明 鰻魚縮項。性不喜動。嚴冬善息土中。故食之能調胃氣。而無動風發熱之慮。與白魚之性相仿。但無利水之功耳。

白魚

甘平無毒。

發明 白魚入肺利水。開胃下氣。金匱治淋病小便不利。滑石白魚散用之。取其佐滑石以利氣。兼亂髮以破血。血氣通調而淋漓止矣。同棗食之。令人腰痛。以其滲泄脾腎也。

石首魚

俗名鯉魚

甘平無毒。乾者名白鯊。

發明 石首魚生鹹水中。而味至淡。故諸病食之。無助火之虞。與河豚之性稟陰毒迥殊。腦中石魷主石淋。腦骨爲末。入有嘴壺中薰腦。漏然惟暴患得効。痢疾切忌油膩。惟白鯊食之最宜。

鰾膠 鹹平無毒。凡用入丸。切作小塊。蛤粉炒成珠。方可磨末。煉蜜調劑。須待涼用。又不可搗搗則粘。難爲丸矣。

發明 諸魚之鰾。皆可爲膠。而石首魚者。膠物甚固。故膏精方用之。合沙苑蒺藜。名聚精丸。爲固精要藥。丹方又以一味炒研。砂糖調。日服一錢。七治痔最良。經久痔自枯落。燒灰治產後風。搗破傷風。瘕取其滋。榮經脈而虛風自息也。

勒魚

甘平無毒。

發明 勒魚腹下有骨勒人因以得名以其甘溫開胃有宜於老人之說作鱖尤良脊骨治瘡以一寸入七寶飲酒水各半煎露一宿服之

鮓魚 甘溫無毒

發明 鮓魚性補溫中益虛而無發毒之慮其生江中者大而色青味極甘美生海中者小而色赤味亦稍薄觀其暗室生光迥非常魚可比其鱗用香油熬塗湯火傷効

嘉魚 甘溫無毒

發明 此魚食乳水。功用同乳。食之令人肥健悅澤。腎虛消渴勞瘦虛損者食之最宜。

鰓魚 此魚骨柔肉脆。能益胃氣。食之令人肥健。腹中子性寒。有毒。多食令人痢下。

鯽魚 甘溫無毒。烏背者其味最美。以其居濁水中。雖肥不無小毒。然此恆用食品。未嘗見其有毒傷人。發明 諸魚性動屬火。惟鯽魚屬土。有調胃實腸之功。故有反厚朴之戒。以厚朴泄胃氣。鯽魚益胃氣。故大明言溫中下氣。保昇言止痢厚腸。皆言其補益之。

功也。生搗塗痰核乳癰堅腫。以豬脂煎灰服。治腸癰。合赤小豆煮汁。食消水腫。炙油調塗婦人陰瘡。同白礬燒研。治腸痔血痢。入綠礬泥固煨。治反胃吐食。與胡蒜煨。治膈氣痞滿。凡煨俱不可去鱗。以鱗有止血之功也。

石斑魚 有毒。

發明 石斑魚生南方溪礪水石處。長數寸。大不過尺餘。有雌無雄。二三月與蜥蜴交。合水上。其子毒人。令人吐瀉。醫說云。用魚尾草汁少許解之。

鰮殘魚

俗名銀魚

甘平無毒。

發明 鰮殘出蘇松浙江大者不過三四寸身圓無鱗潔白如銀小者尤勝鮮食最美曝乾亦佳作羹食之寬中健胃而無油膩傷中之患。

海粉

鹹寒無毒。

發明 海粉色碧微鹹專行肝腎云是海中介屬得東南水土之氣而成與蜂之釀蜜無異土人採得而貨之以供食品能散癭瘤解毒熱但性寒滑脾胃虛人勿食。

燕窩 甘平無毒

發明 烏啣海粉作窩得風日陽和之氣化鹹寒爲甘平能使金水相生腎氣上滋於肺而胃氣亦得以安食品中之最馴良者惜乎本草不收方書罕用今人以之調補虛勞咳吐紅痰每兼冰糖煮食往往獲効然惟病勢初淺者爲宜若陰火方盛血逆上奔雖用無濟以其幽柔無剛毅之力耳

鱸魚 甘平小毒

發明 鱸魚鬆脆與石首魚相類補五臟益筋骨和

腸胃治水氣多食宜人作鮓尤良

鰾魚 甘平小毒

發明 鰾性疎利有補虛益胃去腹內惡血小蟲之功醫說有邵氏女年十八病勞瘵累年偶食鰾魚羹遂愈正與補勞益胃殺蟲之說相符膽治骨鯁及竹木刺入咽喉不拘大人小兒或入腹刺痛服之皆出臘月收大鰾魚膽懸北簷下陰乾遇有梗者用皂子大酒研溫服得吐則鯁隨涎出未出再服以出爲度酒隨量飲無不出者如無鰾魚膽鮓魚青魚鯽魚膽

川鮮者酒調服之亦出

鱧魚

卽鱣魚俗名黑魚

甘寒無毒

發明 鱧性伏土而能勝水故治水腫療五痔治溼痺主脚氣妊娠面浮脚腫者合赤小豆煮食甚効丹方治水腫腹大用活鱧魚去腹垢入獨顆蒜令滿外塗溼黃泥炭火炙食屢効有瘡者不可食令癰白

鰻鱺魚

甘平小毒潤嘴者爲鰻尖嘴者爲鱺

發明 鰻魚雖有毒性能補虛益陰久病勞瘵宜之大便濡泄勿用其功專在滋補真陰殺勞瘵蟲與蛇

同類故主治亦近之。

鰾魚

甘太溫無毒

發明 鰾魚稟已土之氣能補中益血婦人產後惡露淋瀝腸鳴溼痺並宜食之暴乾煨灰存性治老人虛病大鰾魚重筋餘者能助膂力食後遍體疼脹盡力搥之大力丸方用熊筋虎骨當歸人參等分爲末酒蒸大鰾魚取肉搗爛爲丸每日空腹酒下兩許氣力驟長鰾魚血力能助陽壯年陽道不長育龜丸用之方用石龍子蛤蚧生犀角生附子草烏頭乳香沒

藥血竭細辛黑芝朮五倍子陽起石等分爲末生鱗  
魚血爲丸硃砂爲衣每日空心酒下百丸曾有人服  
此得以嗣續宗祧者不可以房術論也其尾血療口  
眼喎斜同麝少許右喎塗左左喎塗右正卽洗去其  
骨燒灰香油調塗流火甚効

甲魚

本名鱉魚

甘溫小毒

發明 鱉魚無鱗而有甲故俗名爲著甲江淮黃河  
遼海水深處皆有之長二三丈逆上龍門能化爲龍  
味極肥美但發氣動風和蕎麥食令人失音其肝味

勝河豚食之令人肌膚乾脫亦動風之驗也。

鱒魚

本名鮓魚生江中長丈餘身無鱗鼻與身等亦鱸屬也

甘平無毒。

發明 此魚味雖美而發諸藥毒動風氣發一切瘡疥久食令人腰痛服丹石人忌之勿與乾筍同食發癰瘰風小兒食之成欬嗽及癥瘕作鮓雖珍亦不益人。

鯪魚

本名鯪魚即鮓魚

甘溫小毒赤目赤鬚無腮者殺人。

不可合牛肝食反荊芥。

發明 鯪魚類蛇故能治風凡目眼喎斜切活鮓魚

尾尖朝吻貼之卽正

黃頰魚

甘平微毒反荊芥。

發明

無鱗之魚不益人發瘡疥。不獨黃頰爲然。

江鱗

一名鱗魚

甘平小毒。

發明

諸魚皆用翅尾游行。惟鱗不勞翅尾。逐隊齊

行。故以命名。種類不一。獨產江水中者。應春而起。味

極鮮美。性專降泄。故敗疽痔漏人忌食。諸鱗皆然。

河豚

甘溫有毒。海中者大毒。江中者次之。淡水中

者又次之。有大小二種。大者謂之河豚。背淡青黑無

赤斑腹白而翅傍色黃者可食小者名斑魚背脊黑有文點多赤色其毒最甚以稟蛟龍之氣最甚也海人言三月後斑魚得木氣全盛之時尤不宜食其雙尾獨目翅赤嘴赤異常背有赤印領內無腮腹中多血獨腴無膽皆大毒傷人製食之法須去其子與嘴目及脊中肝內惡血并去周身脂膜則不氣腥煮忌煤火及煤焰落入與荆芥桔梗菊花甘草附子烏頭相反故食河豚一日內不可服藥河豚子必久漬石灰水中而後煮食曾見水浸一夜大如芡實也中其

毒則唇舌麻瞽頭旋目眩足不任履行步欹側急宜探吐隨覓荻芽或蘆根搗汁灌之橄欖汁甘草汁皆可解又槐花乾胭脂等分爲末水調服之若腹中絞痛昏迷倒仆者急用糞清灌之遲則不救

發明 凡物之美者謂之尤物靡不賈毒傷人如姐已亡殷夷光傾吳蒙其禍而不自覺也河豚嗜鹹內藏信智外顯文刺窄口巨腹陰毒內蓄可知凡陰毒之物必藉陽氣而爲鼓舞得春升之令而浮游水面非信而乎散子必入淡水旣生必歸巨海非智而乎

得鹹則肥得淡則瘦所以淡水中者其毒漸解而不  
致傷人之甚也。以其味美人爭食之。春初最爲貴品。  
其腹腴呼爲西施乳。南人有云。凡魚之無鱗無腮無  
膽有聲目能睨者皆有毒。河豚目能開闔觸之則曳  
曳有聲。噉怒則腹脹如毬。浮起水面。故人得以取之。  
其毒入肝助火。莫有甚於此者。患癰瘍脚氣人切不  
可食。助溼發毒動風。其患最速。惟取其子同蜈蚣燒  
研香油調搽。疥癬有効。挾其目拌輕粉埋地中化水。  
拔婦人脚上雞眼瘡可以脫根。

江豚 鹹腥無毒

發明 江豚形如水牛。藏器雖有飛尸蟲毒瘡之治。從未見有用之者。以之熬油點燈。照樗蒲則明。讀書紡織卽暗。俗言嬾婦所化也。

比目魚 甘平無毒

發明 比目形如箬葉。故俗以是稱之。爾雅所謂東方有比目者是也。魚各一目相並而遊。今吳中崑山最多。孟詵雖有補中益氣之說。而多食動氣。亦是助溼生熱之故。此必溺於佻儷者之所化也。

鮫魚

一名沙魚

甘鹹平無毒。

發明 鮫魚生南海背皮粗錯可飾刀靶其肉作脂

補五藏皮治尸疰蠱毒燒灰解鱖鰻魚毒

烏賊骨

即烏鰂骨俗名海鱸鮑

鹹微溫無毒

發明 烏鰂骨厥陰血分之藥兼入少陰其味鹹而

走血故治血枯血癥經閉崩帶陰蝕腫痛丈夫陰腫

下痢疝疾厥陰本藥也寒熱瘧疾聾瘵少腹痛陰痛

厥陰經病也目瞤流淚厥陰竅病也厥陰爲藏血之

室少陰爲隱曲之地故諸血病陰病皆治之按素問

云有病胸脇支滿妨於食病至則先聞腥臊臭出清液吐血四肢清目眩時時前後血病名曰血枯得之年少時有所大脫血或醉入房中氣竭肝傷月事衰少不來治之以四烏鯁骨一薤茹爲末丸以雀卵大如小豆每服五丸飲以鮑魚汁所以利腸中及傷肝也觀此入厥陰血分可知

鮑魚

辛臭溫無毒

發明 鮑魚腥穢可淡曝而不可著鹽乾則形如塊肉端取腥穢以滌一切瘀積同氣相感也入肝散血

煮汁送四烏鰂一蘆茹丸治女子血枯經閉內經用以療傷肝利腸而不傷伐元氣惜乎世罕用之今庖人用以煮肉則脂沫盡解滌除垢膩之驗也秦始皇死沙丘會暑屍腐令輜車載鮑魚以亂其臭始皇本呂不韋萌孽溺厠宮幃非取其滌除遺臭之義歟

**海馬** 甘溫無毒

**發明** 海馬雌雄成對其性溫暖有交感之義故孕婦帶之於身臨時煨末服之并手握之云易產又陽虛房術多用之可代蛤蚧之功也

鰕俗作蝦

甘溫小毒。蝦無鬚腹下通黑色者食之傷

人

發明 鰕性跳躍生青熟赤風火之象生搗敷小兒

赤白遊風絞汁入藥托腫吐風痰皆取風能勝溼也。制藥壯陽取熱能助火也白者下乳汁專入氣分也。

### 介部

龜版

本經名曰神尾

鹹甘平小毒入藥取腹去背酒浸酥

炙或熬膠用色黑產水中者為水龜其色黃出山中者為秦龜。秦龜不入補腎藥一種呬蛇龜腹折見蛇

則呷而食之其性最毒不可誤用方書皆用灼過敗  
龜之版取其用過無關生命也世以自死龜殼爲敗  
既死精氣已脫取用何益悞服反受其毒以其爲蛇  
虺所傷也今藥肆所賣龜膠每以鹿角膠脚冲入則  
易凝結亦有以黃明膠和入者凡製膠須去背甲以  
淨腹版水浸去外衣則膠無腥濁之氣

本經主漏下赤白破癥瘕瘡五痔陰蝕淫痺四肢  
重弱小兒顙不合

發明 龜稟北方之氣而生乃陰中至陰之物尚行

任脈上通心氣下通腎經故能補陰治血治勞大凡  
滋陰降火之藥多寒涼損胃惟龜版炙灰則益大腸  
止泄瀉故漏下赤白亦能療之其治小兒顙不合專  
取滋水堅骨之功皆龜之所主其破癥瘕瘡五痔  
陰蝕濕痺重著皆秦龜之功用以能入脾經治風溼  
也時珍云龜鹿靈而壽龜首常藏向腹能通任脈故  
取其腹以補心補腎補血皆養陰也鹿鼻常反向尾  
能通督脈故取其角以補命門補精補氣皆養陽也  
觀龜甲所主之病皆屬陰虛精弱腰脚痠痿可心解

矣。燒灰酒服治痘瘡。又合鹿角灰等分入四物湯服。  
治血崩。炙末酒服。主風痺脚弱。燒灰傅小兒頭瘡。婦  
人陰瘡。鰓魚血調塗。流火淫瘡。但胃虛少食。大便不  
實。及妊娠禁用。以其無陽生之力耳。膽汁苦寒。治痘  
後目腫。經月不開。取汁點之。良。溺滴耳。治聾。點舌下。  
治大人中風舌瘖。小兒驚風不語。摩胸背。治龜胸。龜  
背。欲取其溺。以猪鬃刺其鼻。卽出。

玳瑁

卽瑇瑁

甘寒無毒。入藥生者良。

發明

玳瑁入心主血。有解毒解熱之功。故蘇頌以

之磨汁服解蠱毒日華破癥結消癰毒止驚癇士良  
療心風解煩熱行血氣刺大小腸時珍治傷寒熱結  
狂言解毒清熱之功等於犀角同犀角解痘毒痘瘡  
黑陷乃心熱血凝用生犀玳瑁磨汁入豬心血少許  
紫草湯調服則熱解血和而陷痘起矣但虛寒而陷  
者勿用

鼈甲

一名上甲

鹹平無毒九肋七肋者佳以其得陽數

也然多有摘去下肋僞充七肋者亦有半邊隻肋半  
邊雙肋者此團魚與鼈交合而生不若純隻肋者爲

優醋煨酥炙各隨本方治瘡母淋灰湯煮糜如飴用  
龜用大者力勝鼈用小者力優妊婦勿食鼈肉與鳧  
菜鴨卵合食尤忌

本經主心腹癥瘕堅積寒熱去痞疾息肉陰蝕痔核  
惡肉

發明 鼈色青人厥陰肝經及衝脈爲陰中之陽陽  
奇陰偶故取隻肋爲肝經之嚮導其所主者瘕瘕瘕  
母虛勞寒熱癥瘕痞疾經水陰瘡不出本經主治也  
凡骨蒸勞熱自汗皆用之爲其能滋肝經之火也與

龜甲同類並主陰經血分之病。龜用腹。腹屬腎。鼈用肋。肋屬肝。然究竟是削肝之劑。非補肝藥也。妊婦忌用。以其能伐肝破血也。肝虛無熱。禁之。煨灰研極細末。療湯火傷。皮綻肉爛者。並効。乾則麻油調敷。溼則乾摻其痛立止。其解火毒。療骨蒸殺瘵蟲之功。可默悟矣。鼈頭燒灰酒服。療小兒脫肛。婦人陰脫下墜。取其善縮之性也。生血塗之尤効。沈聖符曰。食品中惟鼈最爲叵測。其間多有大毒。不減河豚者。如三足兩頭人所共棄。項強腹赤。毒可傷人。予隣余子坦。曾見蛇。

盤屢跌而成鼈者四生之中物物皆有變化無足異也。且有鼈寶生鼈腹中之說。說者以爲誕妄。姑置罔聞。近日楓江吳氏買一鼈烹之。輒作人言。其家以爲怪也。添火烹之。剖腹果得一物。約長三寸。鬚眉宛然。聖符邀予往看驗。其鼈形背高聳起。稍異尋常。聖符屬筆命記以爲嗜味傷生之警。

鼈甲

甘平無毒

發明 鼈甲炙黃酒浸治癰癰殺蟲。逐風惡瘡。痔瘻風頑疥瘡。功同鼈甲。但鼈走肝而鼈走脾。故其主治

稍有不同

蟹 鹹寒小毒。未被霜者有毒。多食腹痛泄瀉。生薑紫蘇鼓汁蘆根汁並可解之。其性喜入蛇穴。得其毒則驟長。故重一觔以上者。誤食殺人。又兩目相向。足斑目赤者。大毒不可食。

鼠 本經主胸中邪氣熱結痛。噎辟面腫。能敗漆。燒之致鼠。

發明 蟹之外骨內肉。生青熟赤。陰包陽象。無疑性。能破血。故能續斷絕筋骨。本經主胸中邪氣熱結痛。

喝僻面腫皆是瘀血爲患性能敗漆今人生搗治漆  
瘡塗火燙皆取散血之意日華治筋骨折傷生擣罌  
之藏器云能續斷筋去殼用黃搗爛微炒納入瘡中  
筋卽連也可知其功不獨散而能和血矣凡物之赤  
者皆熱惟蟹與柿性寒所以二物不宜同食令人泄  
瀉發癥瘕妊娠忌食以其性專逆水橫行也其爪爲  
催生下死胎胞衣專藥千金神造湯治子死腹中并  
雙胎一死一生服之令死者出生者安神驗方也但  
以一邊運動一邊沉著者卽是無疑方用蟹爪一升

甘草一尺東流水一斗以葦薪煮至二升去滓入真阿膠二兩令烊頓服或分二服若人困不能服灌入卽活取蟹之散血而爪觸之卽脫也然必生脫者連足用之丹方治蓄血發黃胸脇結痛而不浮腫者蟹殼煨存性黑糖調無灰酒下三錢不過數服効若浮腫者爲氣病無藉於蟹之散血也婦人乳癰硬腫蟹殼灰一服卽散又以塗硃燒烟辟臭蟲薰之卽斃則殺蟲之功從可知矣○蟹之相類多種如螭蟬擁劍不常見外其螭蟬螭蟬春時甚多螭蟬螯光無毒可

醢而食。螭蚋螫毛有毒。悞食令人吐下。又有一種生沙穴中。見人則避者。沙狗也。時珍雖言不可食。今海錯中用之。非螭蚋之可比也。

**蟹** 辛鹹平微毒

發明 蟹善候風。外殼內肉與蟹無異。其血蒼色。其肉鬆脆。亦如蟹臍。能散肝腎結血。故產後痢不止。及腸風瀉血崩中帶下。用尾燒灰米飲服。卽止。聖惠方治積年欬嗽。呀呷作聲。用蟹魚殼半兩。貝母桔梗入牙皂末少許。蜜丸噙。一九嚥汁服三丸。卽吐出惡涎。

而瘡

牡蠣 鹹平微寒無毒。煨赤用。左顧者良。

本經主傷寒寒熱溫瘧。洒洒驚恚怒氣。除拘緩鼠瘻。女子帶下赤白。

發明 牡蠣入足少陰。爲軟堅之劑。以柴胡引之。去脇下痛。以茶引之。消項上結核。以大黃引之。消股間腫。以地黃引之。益精收瀉。止小便。腎經血分藥也。本經治傷寒寒熱溫瘧。洒洒是指傷寒發汗後寒熱不止而言。非正發汗藥也。仲景少陽病犯本。有柴胡龍

骨牡蠣湯。金匱百合病變渴。有枯婁牡蠣散。用牡蠣以散內結之熱。卽溫瘧之熱從內蘊驚恚之怒氣上逆。亦宜鹹寒降泄爲務。其拘緩鼠瘦帶下赤白。總由痰積內滯。端不出軟堅散結之治耳。今人以牡蠣濇精而治房勞精滑。則慮其鹹降治亢陽精傷。又恐其斂濇。惟傷寒亡陽汗脫溫粉之法最妙。其肉糟製卽蠣黃醬也。

蚌肉甘寒。殼鹹寒無毒。

發明 蚌與蛤皆水產。而蛤則生鹹水。色白入肺。故

有軟堅積化頑痰之功。蚌生淡水。色蒼入肝。故有清熱行溼。治雀目夜盲之力。蓋雀目則肝腎之病也。初生小兒啞驚。活蚌水磨罌滴入口中。少頃下黑糞而愈。生蚌炙水。治湯火傷甚効。古方用方諸水。清神定魄。以大蚌向月取水是也。

真珠 鹹甘寒無毒。

發明 珍珠入手足厥陰二經。故能安魂定神。明目退翳。解痘疔毒。及痘瘡入眼。治耳暴聾出水。研細末吹之。待其乾脫自愈。煨灰入長肉藥。及湯火傷敷之。

最妙然不可著水著水則反爛肉

石決明

一名珍珠母

鹹平無毒九孔者佳麩裏煨熟水

飛用反雲母

發明 石決明味鹹軟堅入肝腎二經爲磨腎消障之專藥又治風熱入肝煩擾不寐遊魂無定本事方珍珠母丸與龍齒同用取散肝經之積熱須與養血藥同用不宜久服令人寒中非其性寒乃消乏過當耳

文蛤

鹹平微寒無毒卽蛤蜊之殼厚日光有紫斑

文者用酸漿水或醋煮半日許搗粉用

本經主惡瘡蝕五痔

發明 文蛤鹹寒走足少陰經爲潤下之味故能止渴利小便別錄治欬逆胸痺腰痛脇急鼠瘻崩中卽本經主惡瘡蝕五痔之義取鹹能軟堅入血分也仲景傷寒太陽病用水劫益煩意欲飲水反不渴者及金匱渴欲飲水不止並用文蛤散其治反胃吐後渴欲飲水而貪飲者則有文蛤湯總取鹹寒滌飲之義

蛤蜊

鹹寒無毒紫口者良

發明 大都鹹寒之物皆能清熱開胃止渴其殼煨  
赤杵粉能清肺熱滋腎燥降痰清火止欬定喘消堅  
癖散癭瘡無不宜之炒阿膠鯁膠用之以其味鹹能  
發滯性也單方治乳癰每三錢入皂角刺末半錢溫  
酒調服治肺癰一味童便煨研甘桔湯日進三服屢  
驗然須冬時取枯蕒實和穰子同搗仍入殼中懸當  
風處陰乾以供一歲之用否則難於取應也

蛭 甘平無毒

發明 蛭生江湖中與蚌蛤相類閩人以田種之謂

之煙田其肉可爲淡乾。腸鼻糟之以充海錯。婦人產後虛熱宜之。

魁蛤殼

俗名蚶子  
卽瓦礫子

肉甘平殼鹹平無毒。

發明 蚶肉僅供食品。雖有溫中健胃之功。方藥曾未之及其殼煨灰則有消血塊散痰積治積年胃脘瘀血疼痛之功。與鼈甲蟲蟲同爲消瘡母之味。獨用醋丸則消胃脘痰積。觀製蚶餅者以蚶殼灰泡湯搜糯粉則發鬆異常。更堅之力可知。

車螯

一名

鹹冷無毒。

發明 車螯是海中大蛤。以其吐氣成樓。故名曰蜃。所謂雀入淮爲蛤。鳩入海爲蜃者是也。其肉解酒毒。消渴。殼治瘡腫。癰毒。燒赤醋淬爲末。同甘草等分酒服。并以醋調敷之。日華法也。

貝子 鹹平小毒。燒赤搗細如麩。以清酒淘過。用白者入氣分。紫者入血分。花者兼入血氣。

本經主目翳。五癰。利水道。鬼疰蟲毒。腹痛下血。

發明 貝生南海。雲南極多。土人用爲錢貨交易。因其味鹹軟堅。故本經專主目翳。其治五癰等病。取鹹。

潤走血之力。千金腳氣丸中用之。專取鹹能破堅之意。雖數十年之疾。靡不克効。以其透入骨空。搜逐溼滯之氣。和諸藥蒸蒸作汗。次第而解也。古方點目。用貝子粉。入龍腦少許。有瘕肉。加珍珠末吹點。亦入老醫諸方。紫貝治小兒癰疹目。醫今人用以研紙。謂之研羸。大者曰珂。亦名馬刺螺。治目消翳。去筋膜努肉。與貝子相類。分紫白。煨灰用之。

石蜊

一名龜脚

目鹹無毒

發明 石蜊生東南海中石上。蚌蛤之屬。形如龜脚。

殼似海螯與吐蛭等同爲海錯而此稍遜然其有利小便之功吐蛭不如也

淡菜

甘溫無毒

發明 淡菜生鹹水而味不沾鹹爲消癭之善藥兼補陰虛勞傷精血衰少及婦人帶下理腰脚氣不宜多食久食令人陽痿不起及脫人髮一切海中苔菜皆然不獨淡菜也

海羸

摩名  
甲香

鹹平無毒

發明

海羸肉甘寒食之能止心痛生螺汁洗眼止

痛經二三十年者。輒應入黃連末點之。尤良。麝性  
閉藏。能歛香氣。經月不散。獨燒則臭。與沉麝諸香及  
諸花和蠟煎成者。曰甲煎。可作口脂。千金方用之。唐  
李義山詩。所謂沉香甲煎。爲庭燎者是也。其殼五色  
璀璨。爲鈿最精。燒過點眼。能消宿醫。惜乎專目科者  
罕知。

羸

卽螺

甘寒無毒。

發明 羸蚌蛤蟹龜鼈之類。皆外剛內柔。稟離火之  
象。雖居泥水而性寒。治火熱之毒最捷。用珍珠黃連。

嵌入良久。取汁注目中。止熱。壅目痛。生搗絞汁。和無灰酒飲。治黃痺。小便不利。田中大螺。去掩入冰片少許。埋土中。一伏時。化水。療痔瘡。又搗爛和麝香貼臍上。引溼熱下行。治噤口痢。土牆上爛殼。燒灰敷痘瘡。及臙瘡。溼毒生田中者。得土氣多。而形大。生水者。得水氣多。而形小。其治水腫黃痺。目赤腫痛。痔腫脫肛。消渴解酒之功。則一產徽州溪澗中者。其肉青碧可愛。土人取肉焙乾。以充方物。但性冷利。人過食。令人腹痛泄瀉。急磨木香酒解之。

寄居蟲

甘溫無毒

發明 藏器曰寄居蟲在螺殼間非螺也候螺蛤開  
卽自出入螺蛤欲合已還殼中海族多被其寄南海  
一種似蜘蛛入螺中負殼而行觸之卽縮人螺火炙  
乃出婦人難產以七枚搗酒服之或臨產兩手各握  
一枚與相思子無異弘景云食之益顏色美心志惜  
乎一時不易得也

郎君子

卽相思子

發明 相思子狀如螺中之子大如小豆藏篋筥積

歲猶活。置醋中卽盤旋不已。婦人難產。手把之便生。  
屢驗。

禽部

鶴頂 辛溫大毒

發明 鶴食蛇虺而頂血大毒。力能殺人人之欲求  
自盡者。服之卽斃。而嘉祐又以鶴血益氣力。補虛乏。  
去風益肺。恐未必然。肫中砂石子磨木服。能解蠱毒。

鶴骨 甘寒小毒

發明 鶴骨治尸疰喉痺。蛇虺傷。專用其毒以攻伏。

匿之毒也。嘴及脚骨尤良。卵能預解痘毒。水煮一枚。與兒啖之。令不出痘。或出亦稀。與鶴卵同功。

鵝鵝

鵝鵝即鵝

鹹寒無毒

發明

鵝鵝好啖魚蛇及鳥雛。故治痞積有蟲。鵝丸

用之爲君。治食魚鼈成痕者尤効。其骨酥炙和南星砂吹喉。治骨哽忍之須臾。輕輕咯之。骨與痰涎俱出。

鵝鵝

鵝鵝即鵝

鹹溫滑無毒

發明

淘鵝油性走能引諸藥透入病所拔毒。故治

聾痺腫毒諸病。其舌治疥瘡。取入心拔毒外出也。

鵞 白者甘平無毒。蒼者有毒。嫩者尤劣。

發明 鵞氣味俱厚。發風發瘡。莫此爲甚。別錄謂其性涼利。五藏是指蒼者而言。韓氏謂其疎風。是言白者之性耳。昔人治癰風方中。取純白鵞通身之毛。及嘴足之皮。與肺肝內皮同固濟煨灰。存性和風藥用之。爲風藥之嚮導也。然不可遺失一處。其處卽不能愈。又不可用雜色者。若有一處色蒼。風愈之後。其處肌膚色黑。此與蛇發風毒。白花蛇善解風毒之義不殊。白鵞脂祛風潤燥。解礬石毒。血能涌吐。胃中瘀結。

開血膈吐逆食不得入。乘熱恣飲。卽能嘔出病根。以  
血引血。同氣相求之驗也。中射工毒者。飲之。并塗其  
身。卽解。以其能食此蟲也。尾膠內耳中。治聾及聾耳。  
取以達三焦之氣也。涎治誤吞稻芒。亦物性之相制。  
耳白。鵞屎絞汁。治小兒鵞口瘡。蒼鵞屎。傅蟲蛇咬毒。  
雁 甘溫無毒。

本經主風攣拘急偏枯。血氣不通利。

發明 雁爲信鳥。豈宜食之。故道家謂之天厭性。善  
通利血氣。風攣拘急偏枯。取肉炙熟。帖之。昔黃帝製

指南於雁脰骨空中製鍼取其能定南北也。但覓之不易。今人於鯉魚腦中製之。以其性專伏土。定而不移。可定水土之方向也。

鷺鵒家

甘溫無毒。嫩者有毒。老者無毒。

發明 鷺之逼火而生。唼水而長。未出卯時。先得火氣。故不憚冰雪。偏喜滂雨。而尾髯癯濁最甚。故羣雌一彼其氣。皆得生化之機。不待鷺尾之遍也。溫中補虛。扶陽利水。是其本性。男子陽氣不振者。食之最宜。患水腫人。用之最妥。黑嘴白毛者。治人胃久虛。葛可

久白鳳膏用之。取金水相生之義。綠頭老鴨治陽水  
暴腫外臺鴨頭丸用之。取通調水道之義。白鴨生血  
能補血解毒。勞傷吐血。衝熱酒調服。屢効。中射工溪  
毒及野葛砒霜毒。灌之卽解。悞吞金銀入腹。乘熱頓  
飲數升。其金卽下。諸鴨涎治穀麥芒入喉。及小兒瘰  
風反張。滴之卽消。卵能閉氣。以混沌未分。塞人聰慧。  
諸病忌食。而滯下尤禁。白鴨通殺石藥毒。凡服藥過  
劑。昏迷眩暈者。取白鴨通一合。湯漬澄。清服之。卽解。  
勿以其穢而棄諸。

鳧

鴨即野

甘平無毒。

發明 鳧逐羣飛。夏藏冬見。與鴻雁不異。其在九月以後。立春以前。味極甘美。病人食之。全勝家鴨。以其肥而不脂。美而易化。故滯下泄瀉。喘欬上氣。虛勞失血。及產後病後。無不宜之。雖有安中利水之功。而方藥曾未之及。孟詵除十一種蟲等治。未能深信。摘玄方解。挑生蠱毒。取生鳧血。熱飲探吐。於此可悟生鷺血。可吐胸腹諸蟲。血積。總以血引血。同氣相應之力耳。

雞 甘平小毒。諸雞有五色者。黑雞白首者。六指者。死足不伸者。並不可食。

發明 雞屬巽而動風。外應乎木。內通乎肝。得陽氣之最早。故先寅而鳴。鳴必鼓翅。火動生風之象。風火易動而易散。人之陽事不力者。不宜食雞。是以昔人有利婦人不利男子之說。而東南之人。肝氣易動。動則生火。生痰病邪得之爲有助也。北方陽氣潛伏。最宜發越。病邪得之。便能作汗。以其能助肝氣也。姑以物性之常變言之。諸雞中惟烏骨白絲毛者最良。巽

象變坎得水木之精氣肝腎血分病宜之烏骨雞丸。  
治經癸胎產虛熱諸病以其峻補肝血也。今人治賊  
風痛痺專取五爪烏骨雞置病人痛處任其鳴啄。  
少頃其痛自止。雞之五爪者有毒此專取其毒以引  
其毒外泄也。丹雄雞治女人崩中漏下赤白沃通神  
明殺惡毒辟不祥中惡魔魅以血灌鼻卽蘇中風口  
眼喎斜乘熱塗患處卽正。雞冠血和酒釀調陵鯉甲  
末治痘瘡肝熱毒盛而變青乾紫黑陷伏黃雌雞治  
產後虛羸煮汁煎藥最宜。黑雌雞治妊娠胎息不安。

泰和老雞。內托小兒痘瘡。近世治產後虛羸寒熱。亦取用之。以其能助肝經生氣也。雄雞肝。取不落水者。研爛和蜂蠟酒釀。頓熟。治小兒疳積壞眼。日服無間。腎盡爲度。雞脆胫。俗名雞內金。治食積腹滿。反胃泄利。及眼目障翳。雞卵治傷寒發狂。欬嗽失音。並生食之。以雞卵畧敲損。勿令清漏。浸尿中。冬三夏一日。取煮食之。治哮喘風痰。雞子清。治伏熱目赤。喉痛。雞子黃。治產後胞衣不下。並用生者。又以煑熟去白。取黃同亂髮香油熬化。塗嬰孩胎毒熱瘡。抱出卵殼。研細。

爲末去日中瘴腎燒灰蜜調塗嬰兒頭身諸瘡卵殼  
中白皮同麻黃紫苑治久欬氣結服雞子乃不孚之  
卵取以同犬屎敷腫瘍其痛立止千金方也雞矢白  
爲散無灰酒下一錢七治蠱脹腹滿內經雞矢醴也溏  
矢和石灰末塗疔腫半日許卽能拔出

雉

卽野雞

甘酸溫小毒

發明 俾雅云蛇交雉則生蜃蜃爲雉入大水所化  
推其變化之源必由異氣所感水經云蛇雉遺卵於  
地而爲蛟其卵遇雷則入地不遇雷則仍爲雉於此

可悟其化蜃總由靈蛇之性未泯不得山靈之氣遂其飛騰則得滄漠之氣恣其吞吐是與虹蜺奚擇哉別錄言其補中益氣力止泄痢除蟻癭此指尋常之雉而言千金以之治蟻癭因其喜於食蟻乃用以製之也周禮包人供六禽雉是其一亦食品之貴然有毒不可常食有病人尤非所宜而春夏不可食者以其食蟲蟻也時珍曰雉屬離火雞屬巽木故煮雞則冠變煮雉則冠紅火性暴烈發痔發瘡與家雞子同食令人發疰週身疼痛爲患種種惡得謂之無毒乎

烏鴉

酸甘平無毒。種類有四。小而純黑者爲烏。大嘴而腹下白者爲鴉。竝入藥用。其項白而大者爲燕烏。嘴赤而小者爲山烏。皆不入藥。

發明 慈烏反哺。性稟孝慈。嘉祐雖有補勞治瘦之功。骨蒸羸弱。欬嗽之治。然血肉之中。豈無他味。而忍傷孝慈之物哉。○烏鴉嘴大。貪戾傷生。時珍取治暗風癰疾。勞傷吐血。欬嗽殺蟲等病。專取搜逐風毒之用。與慈烏之調補虛羸。各有仁慈剛暴之用。奚啻天淵。

鵲重

甘寒無毒

發明 鵲性靈慧能知吉凶觀其營巢開戶必背太  
歲而向太乙非鵲鳩之可比別錄用之爲下石淋專  
藥以其鳴必掉尾取其週身之氣悉向下通也藏器  
有云燒灰淋汁飲之令人淋石自下蘇頌言婦人不  
可食以其相視而通音感而孕也其腦燒之入酒同  
飲令人相思蘇頌之說得非緣此○鵲重巢日華取  
多年者燒之療顛狂鬼魅及蟲毒仍呼祟物名號亦  
敷癭瘡千金治婦人難產取多年生育相安之義

鷓鴣

甘溫小毒

發明 此物食烏頭半夏苗好啖此者多發咽喉頭  
腦腫痛。甘草生薑並可解之。唐本言鷓鴣治嶺南野  
葛菌子生金毒及溫瘧久病欲死者。合毛熬酒漬服  
之。或生搗汁服最良。日華云酒服主蠱氣欲死。孟詵  
云能利五藏益心力。令人聰明。

鷓

甘平無毒

發明 鷓主腹大如鼓。解熱結。療小兒疳。按鷓乃蛙  
化氣性相同。蛙與蟹蟃皆解熱結。治疳利水消腫。則

鵝之消鼓脹蓋亦同功。食後下如鵝脂數次即愈。

鴿 鹹平無毒。

發明 鴿之品類頗多。惟白者入藥。能解諸藥毒。久患虛羸者。食之有益。調精益氣。治惡瘡疥癬風瘡白癩風。瘰癧瘍風。煮熟酒服。無不宜之。鴿卵能稀痘。其矢氣臭之。能殺療蟲。虛勞家咸多畜之。

鴿

俗作鴿即黃鵠  
月令名倉庚

甘溫無毒。

發明 此鳥感春陽先鳴。故能補益陽氣。食之令人不妬。以陽和之氣。能勝陰毒也。按陽熒止妬論云。梁

武帝鄒后性妬。或言倉庚爲膳療治。遂令食之。妬果減半。

雀卵 甘溫無毒。服朮人忌食。

發明 雀屬陽而性淫。故能強壯陽事。火衰陰痿。精寒者最宜。陰虛火盛者禁用。雀卵治血枯。素問有四鳥。鰓骨一。蔥茹丸用之最妙。如無雀卵。生雀肝代之。頭血主雀盲。腦用綿裹塞耳。治聾。雄雀尿名白丁香。去目中翳膜。及而上黥黑。但取直者。卽雄與假鼠糞無異。入藥有効。

伏翼

卽蝙蝠屎  
名夜明沙

鹹平無毒。伏翼煨灰用夜明砂淘

淨焙用。

本經主目瞑癢痛。明目。夜視有精光。其尿治面癰腫。皮膚洗洗時痛。腹中血氣破寒熱積聚除驚悸。

發明 本經治目瞑癢痛。用伏翼近世目科惟用夜明砂。鮮有用伏翼者。要皆厥陰肝經血分藥也。其伏翼尿能破結血消積。故目腎盲障。瘧瘵淋帶。瘰癧癰疽皆用之。然蝙蝠食之大能利人。稍虛者不可輕用。

五靈脂

卽寒號蟲矢  
又名場明

苦酸寒小毒。研細酒飛去砂。

石晒乾生用則破血炒用則和血

發明 鵲鳴候時鳥也晉地有之春夏羽儀豐盛冬時裸形晝夜哀鳴故楊氏丹鉛錄謂之寒號蟲尿名五靈脂謂狀如凝脂而受五行之靈氣也其氣腥穢其味苦酸大傷胃氣綱目言其甘溫恐非正論雖有治口腎中脘疼痛之功惟藜藿庶可應用終非膏粱所宜同蒲黃名失笑散治一切心胸腹脇少腹諸痛及產後結血血崩目中生翳往來不定其性入肝散血最速但性極癘惡脾胃虛者不能勝其氣也

斑鳩 甘平無毒。

發明 斑鳩補腎故能明目。治虛損益氣。食之令人  
不噎。目科斑鳩丸。錦鳩丸。用之取氣血爲引導。以助  
補腎明目之功也。

伯勞 平有毒。

發明 方藥未有用者。其毛治小兒繼病。俗作魃病。  
取毛帶之。繼病者。母有娠乳兒。兒病如瘡痢。他日相  
繼。腹大。或癢。或發。他人有娠。相近亦能相繼也。北人  
未識此病。

鸛鵒

俗名  
八哥

甘平無毒。

發明 鸛鵒目和乳汁滴目。令人目明。能見霄外之物。甚言明目之効耳。肉治噎逆。及五痔止血。並炙熟食之。

啄木鳥

甘酸平無毒。形色與畫眉鳥相似。但頭頂有紅毛一片。嘴與爪皆堅銳如鐵。故能啄木取蠹。不可不辯。

發明 啄木性專殺蠹。故能治人藏府積蠹之患。時珍治勞瘵癰痿。皆取制蟲之義。燒灰存性。治痔漏蟲。

管納孔中。不過二三次。愈。丹方治噎膈。諸藥不効。以之熬膏。入麝香一錢七。晝夜六時嗅之。膈塞自開。蓋噎膈多有因鬱積所致。以其善開木鬱之邪也。

鷓鴣

卽水老鴉

酸鹹溫微毒。或云鹹寒誤。

發明 鷓鴣性寒利水。能治腹大如鼓。體寒者。以鷓鴣燒存性爲末。米飲服之。其骨煨灰。蜜調綿裹。治魚骨鯁與白鷺骨同功。嘴骨尤効。鷓鴣屎多在石上。色紫如花。就石刮取。名蜀水花。能去面上黥黑。癰瘰。滅癰疽及湯火瘡痕。和猪脂敷。疔瘡。

鷹屎白 微寒無毒。

本經主傷撻滅癥。

發明 虎嘯則風生於地。鷹揚則風動於天。具體雖殊。機應則一。鷹具雄健之翮。不能長恃無虞。至秋火伏。金生。令行。改革。勁翮漸脫。弱翎未振。卽有雄風未遂。奮揚。是以衆鳥侮之。月令所謂鷹乃祭鳥是也。古聖觸物致思。專取鷹之屎白。滅傷撻痕。雖取穢惡。滌漬。實取其翮之善脫也。後人推而廣之。用以滌除目中宿翳。吹點藥中。咸取用之。其屎中化未盡之毛。謂

之鷹條入陰丹陽丹不特取其翮之善脫以治難脫之病并取其屎中未化之羽以消目中未脫之翳穎脫之妙用。崇古未宣因顯示後起母失本經取用之義。

鵬

溫小毒。

發明 鷹鶚鵬骨皆能接骨以鷺鳥之力在骨故以骨治骨從其類也。折傷斷骨燒灰每服二錢酒下。在上食後在下食前。骨即接如初。但在三日內者易治。三日外則難治。以氣血凝滯不能合轍也。

鴟 鹹平小毒

發明 鴟頭治頭風目眩顛倒癰疾千金治頭風眩  
轉面上遊風有鴟頭酒聖惠治旋風眩冒有鴟頭丸  
總取旋風健搏之力

鴟 甘溫小毒

發明 鴟治風癰噎食取初生無毛者一對黃泥固  
濟煨存性爲末每服一匙溫酒服之頭主痘瘡黑陷  
用臘月者燒灰酒服之當起

鴟鵂

俗呼貓頭鷹

酸微鹹小毒

發明 鴟鵂不祥之物古方罕用。近世治傳屍勞瘵。專取陰毒之味。以殺陰毒之蟲也。方用鴟鵂酒煮焙。乾同大鰻鱺七條。攤薄荷上蒸爛。和薯蕷一觔。搗焙細末。爲九。空腹酒下三錢。功用與獺肝彷彿。方士用以昏夜露煮。以聚鬼魅。是以至陰之味。誘至陰之物也。

鳩 大毒。

發明 鳩產蠱毒瘡癰之鄉。鍾毒最烈。非宿檳榔不能自安。以其無枝。人莫能捕也。人欲求自盡者。以翅

羽調酒服之立斃。與鶴頂之毒無異。別錄云。鳩喙殺  
蝮蛇毒時。珍言蝮蛇中人。刮末塗之。卽愈。如極惡之  
人。有以用之。未嘗不解危救急也。

### 獸部

豬 甘平無毒。同驢馬肉食之。令人霍亂。同羊肝食  
之。令人心悶。與生胡荽同食。傷人臍。

發明 豬屬水獸。性嬾。善淫。飽食無所用力。周身脂  
膏不流。故人食之。助溼生痰。莫此爲甚。而肥盛之人。  
尤非所宜。一種蹄甲白者。有金水相生之象。稍異尋

常鹽漬風乾製爲兩腿有補養脾胃之能病人食之  
畧無妨礙良非鮮者之比丹溪云豬肉補陽陰虛者  
切宜少食蓋肉性入胃便作溼熱生痰痰生則氣不  
降而諸證作矣故痰嗽家最忌然肺燥乾欬及火嗽  
痰結者食之痰卽易出其嗽便止但不宜過鹹耳當  
知助溼生痰惟中間膘脂一層專助脾溼若皮則走  
肺益氣精者補肝益血但嫌難尅化耳其汁則全是  
膘脂鎔化食之滲入經絡故東垣言之頗詳千金治  
打傷青腫灸精豬肉搗之小兒火丹生豬肉切片貼

之漆瘡作癢宜啖豬肉并以豬脂塗之男女陰蝕肥  
豬肉煮汁洗之不過三十筋瘡山行石蛭著人足則  
穿肌入肉但以臘脂膏和鹽塗足脛趾卽不著人也  
急救方治竹木刺入肉以多年燻肉切片包裹卽出  
其腎性堅難化且藏滯火最不益人而治腎虛腰痛  
豬腎切開入人參末一錢溼紙裏煨每日空心嚼一  
枚或入青蛾丸中煮食並效其治水腫用豬脂丸便  
血用藏連丸皆用以爲引藥入病處耳心血治驚風  
癲癇蓋以心歸心以血導血之意得冰片入心經也

卒中惡死、尾血灌之、取其動而不息之意、并縛豚枕之、卽活。蛇入人孔、割母豬尾血滴人卽出。用肝者、肝主藏血、血病用爲嚮導。故脫肛、肝虛、雀目、用之。脰卽三焦、能滌除腎藏邪毒垢膩、故同胡黃連等藥治癰瘡。最捷用膽者、取其瀉肝膽之火。故仲景白通湯用爲嚮導。蓋寒能勝熱、滑能潤燥、苦能入心也。傷寒熱邪燥結、有豬膽導法。又膽汁和香油等分、亦治癰瘡結毒。清晨連服七日、大便下泄、邪毒最捷。未盡停七日更服。七日餘邪自盡。屢驗。尿脬治產婦傷膀胱急。

用上好人參一兩入胖中煮食。日日服之。稍或遲延。氣血衰冷。不可療矣。齒治驚癇。乳能斷酒。千金方用之。其膚者。皮上白膏是也。取其鹹寒入腎。用以調陰散熱。故仲景治少陰病下利咽痛。胸滿心煩。有豬膚湯。予嘗用之。其効最捷。豚卵治陰莖中疼。驚癇鬼氣。蠱毒除寒熱。貢豚五癰邪氣。攣縮豬蹄煮湯去油煎。催乳藥及蘸洗潰瘍。有効。蹄甲本經治五痔。伏熱在腹中。腸癰內蝕。今目疾外障亦用之。豬腦治風眩腦鳴。凍瘡癰疽塗紙上貼乾。則易之。禮記云食豚去腦。

孫真人食忌云。豬腦損男子陽道。酒後尤不可食。延壽書云。以鹽酒食豬腦。是自引賊也。豬骨燒存性。爲末。水服方寸匕。治食諸果中毒。又解馬肝漏脯等毒。豬毛燒灰。麻油調塗湯火傷。留竅出毒。則無痕。豬屎古方取用頗多。千金治患霧氣。心煩少氣。頭痛項急。起則目眩欲倒。戰掉不安。憎寒微熱。心中欲吐。吐時無物。用新豬屎二升半。內好酒一觔。攪令散。以生布絞取汁。更以綿濾。頻服之。卽地鋪暖覆卧。面前著火。常令汗出。得汗待其自乾。乃起。亦治風勞蠱毒。燒灰。

發痘瘡黑陷。無價散用之。又衝沸湯。蒸麻疹。陷伏。卽起。總取穢惡。以辟不祥之氣。同氣相應之用耳。

狗 鹹酸溫無毒。熱病後忌食。妊婦食之。令子無聲。發明 狗屬土。而有火。故及人履其地。雖卧必省。天時亢熱。則卧陰地下。元虛人食之最宜。但食後必發口燥。惟啜米湯以解之。敗瘡稀水不飲。曰噉狗肉。最佳。痔漏人歲久不愈。日食自瘡。凡食犬肉不消。心下堅。或腹脹口乾大渴。心急發熱。妄語如狂。或洞下泄。以杏仁一升。合皮熟研。沸湯三升。和取汁。分三服。利。

下肉片大驗。狗膽本經主明目。取其夜能見物也。陰莖治傷中陰痿不起。除女子帶下十二疾。狗頭骨煨末止婦人崩中下痢。取其溫而能散也。狗屎中米名戊腹糧。又名白龍砂。主噎膈風病及痘瘡倒靨。用此催漿爲最。取其性溫熱也。若乾紫黑焦爲血熱毒盛。慎勿悞用。其血能破妖邪。以性屬陽。陰邪不能勝之也。

羊 甘溫有毒。羊類多種。惟白羯者良。胡羊毛捲洮羊毛豐。肉厚皮薄。並可爲裘。牂羊墳首。獐羊色黃。形

羸味薄。不堪供饌。凡煮羊忌用銅器。有宿熱者不可食。大病食之必發熱。瘡家及痼疾家食之必發。以其食百草之毒也。羊肉不可共生魚鮮食。能害人。白羊黑首。食其腦作腸癰。羊肝共生椒食之。傷人五藏。羊蹄中有白珠者。名羊懸食之。令人癩。羊獨角及四角者。關外有之。皆有毒。不宜食。

發明 羊爲肺家之獸。目無瞳子。周身之氣皆聚於肺。故其氣最腥膻。而性味甘溫。色白補肺。是以昔人有人參補氣。羊肉補形之說。金匱治產後腹中虛痛。

及少腹寒疝。並川當歸生薑羊肉湯。專取羊肉之汁。溫煮湯去滓。以助當歸生薑辛散之力。虛滯得以開矣。羊腎治腎虛。膀胱畜熱。胞痺小便淋瀝。疼脹千金。腎瀝湯以之爲主。羊石子。卽羊之外腎。治腎虛精滑。本事金鎖丹用之。羊脬治下虛遺溺。溫水漂淨入補骨脂焙乾爲末。卧時溫酒服半兩。不過四五服。卽瘥。羊肝補肝。專主肝經受傷。目無精光之病。膽治青盲。目暗。膽開竅於目。膽汁充則目明。膽汁減則目暗。古方碧雲膏。臘月取羯羊膽。以蜜盛滿懸簷下。待霜出。

掃藏點眼神効。羊乳潤而且補。反胃人宜時時食之。  
取開胃腕潤大腸之燥也。青羊者尤良。羊肺治嗽止  
渴。久嗽肺虛者宜之。羊脂主反胃止汗。治虛羸小便  
數。羊脂生主下痢脫肛。取潤以導之。補中寓瀉也。熟  
主賊風痿痺。潤肌膚。入膏透經絡。風熱毒氣。婦人產  
後腹中絞痛。九劑中最宜。羊脰滌除藏府垢膩。與豬  
脰同功。而入肺祛痰尤捷。羊骨稟西方堅勁之氣。最  
銳。得火煨以濟之。可以消銅鐵。故悞吞銅鐵者用之。  
觀磨鏡者。非此不明。其治賊風痺痛。同虎骨煨灰酒。

服皆隨痛處取用羊鬚燒灰敷小兒額疳并療蠅螬  
尿瘡羊胎炙乾入藥亦能補人與鹿胎紫河車同入  
六味地黃丸中名三台丸調補腎虛羸瘦最爲得力  
羊血解石藥毒外臺云凡服丹石人忌食羊血十年  
一食前功盡亡凡服石藥覺毒發刺羊血熱飲一升  
卽解服地黃何首烏補藥者忌之

殺羊角

殺音古  
黑羊也

鹹平無毒

本經主青盲明目止驚悸寒泄久服安心益氣輕身  
殺毒蟲入山燒之辟惡虎狼

發明 殺羊與羚羊俱是野獸。殺則雄猛倍甚。角亦起稜。與羚羊不殊。但色黑如漆。故專伐腎邪。辟不祥。與羚羊大都彷彿。互參本經。此言青盲明目。卽羚羊之專主明目也。此言止驚悸。卽羚羊之治魔寐也。此言止寒泄。卽羚羊之去惡血注下也。此言久服安心益氣輕身。卽羚羊之益氣起陰氣也。此言殺毒蟲辟惡鬼。虎狼卽羚羊之辟蠱毒惡鬼不祥也。但此主寒泄。本乎腎虛不能攝津。彼主惡血注下。係乎肝傷不能統血。而別錄治蠱毒吐血。又與羚羊主治相符。究其

大綱此專補救腫人。彼專消磨腎障。一皆證治之常。至於燒之辟惡鬼虎狼。如此奇突。迥出意表。非尋常之可擬也。

牛 甘溫無毒。同豬肉食之。生寸白蟲。獨肝牛善噉蛇食之。傷人。春月白死牛肉。及生疔牛肉。食之。令人瘟急。以生甘草煮汁解之。剝瘟牛傷手足者。令人脹滿急。宜解之。遲則不救。

發明 黃牛肉補氣與黃耆同功。觀丹溪倒倉法論。而引申觸類。則牛之補土可心解矣。又以黃牛肉取

四蹄各五觔熬膏去滓收乾如鹿膠法名霞天膏主  
中風偏廢口眼歪斜痰涎壅塞五藏六府留痰宿飲  
癰塊手足皮膚中痰核及大病後極虛羸瘦每觔入  
茯苓四兩頓焙空腹酒服三四錢肥盛多痰者每觔  
入半夏麴四兩廣皮二兩丸服大効牛本屬坤土而  
膽主風木故能鎮肝明目臘月用釀南星末陰乾歲  
久多製則苦潤不燥治經絡風痰及小兒驚痰其功  
不減牛黃牛骨髓補中填骨髓久服增年能潤澤肌  
膚黃牛腦和藥治頭風腦漏牛角腮本經下閉血瘀

血疼痛。女人帶下血崩。燔之酒服。宗奭曰。燒灰主婦  
人血崩。大便下血。血痢。牛血性溫。能補脾胃諸虛。治  
便血。血痢。一切病後羸瘦。咸宜食之。其膈乃肺系肉。  
團瓦上焙乾。爲末。酒服。治喉痺氣癭。古方多用之。或  
以製藥益佳。取引入肺經。以通氣結耳。與豬羊靨療  
治不殊。牛齒燒灰。治小兒疳。牛乳補虛羸。止渴噎膈。  
反胃。大便燥者宜之。入生薑葱白。止小兒風熱吐乳。  
牛馬肉共生魚食之。成醃。瘕牛尿治水腫。但胃虛少  
食。人勿用。牛屎燒灰。傅小兒痘瘡潰爛。產寶治子死。

腹中以溼牛糞塗之。牛薺草絞汁治反胃噎膈取其  
沾涎之多也。

馬 辛溫有毒。綱目作甘涼。非。馬脚無夜眼。白馬黑  
頭。白馬青蹄者皆不可食。鞍下肉食之殺人。肝亦不  
可食。以鞭驅之傷皆聚於肝也。食馬肉中毒欲死以  
香鼓杏仁各二兩蒸熟杵末服之。或煮蘆根汁飲之。  
發明 按靈樞經云。卒口僻急者目不合。熱則筋縱。  
目不開。頰筋有寒則急。引頰移口。有熱則弛。縱緩不  
勝收。故僻治之以馬膏。膏其急頰。以白酒和桂塗其

緩頰以桑鈎勾之。卽以生桑灰置之。坎中高下以坐。等以膏熨急頰。且飲美酒。噉炙肉。不飲酒者自強也。爲之三拊而已。世多不知此方之妙。竊謂口頰喎僻。乃風中血脈也。手足陽明之經。絡於口。會太陽之經。絡於目。寒則筋急而僻。熱則筋緩而縱。故左中寒則逼熱於右。右中寒則逼熱於左。寒者急而熱者緩也。急者皮膚頑痺。營衛凝滯。治法急者緩之。緩者急之。故用馬膏之甘平柔緩。以摩其急。以潤其痺。以通其血脈。用桂酒之辛熱急束。以塗其緩。以收其縱。以和

其營衛以通其筋絡。桑能治風痺通節竅也。病在上者。酒以行之。甘以助之。故飲美酒。噉炙肉云耳。馬白睛治癰痛時發。千金方用之。馬心食之喜忘。馬肺食之寒熱。菱陽馬鞍下肉食之。傷人五藏。馬乳祛風止渴。白馬蹄本經主驚邪。瘰癧乳難辟鬼氣。鬼毒蠱疰不祥。別錄止衄內崩。齩齒白馬者治婦人白崩。赤馬者治婦人赤崩。髻毛主小兒驚癰。女子崩中赤白。隨其色用之。燒灰止血塗惡瘡。尾主女人崩中。小兒客忤。白馬陰莖本經主傷中絕脈。陰不起。強志益氣。長肌肉肥健。

生子野馬陰莖食之令人陰萎野馬肉食之成馬癰筋脈不能自收持馬溺微寒小毒治癰疽有驗反胃有蟲積者亦能治之潰瘍著肉腐爛轍骨毒能傷人馬矢煨風痺藥酒取其透達直入病所也馬通止血解毒千金梅師治吐血衄血肘後治卒中惡吐利不止經驗治絞腸沙腹痛欲死俱絞汁服之又肘後治久痢赤白聖惠治傷寒勞復俱燒灰服之千金治筋骨破傷以熱馬屎敷之又治破傷腫痛以馬屎燒烟熏之聖惠治疔腫傷風腫痛以馬屎炒熱熨之靈樞

椒薑桂酒置馬矢煨中助一切藥力也。今人以馬屎  
煨烟熏鼈蝨臭蟲無不斃者。食馬肉心煩者飲美酒  
則解。飲濁酒則劇。

**驢** 甘溫無毒。綱目作甘涼。誤。

發明 驢肉食之動風。脂肥尤甚。日華子言治一切  
風。是指烏驢而言。烏驢皮治風補血。東魯阿井水煎  
膏用之。驢鬚熬膏能長鬚髮。與馬鬚同功。驢莖強陰  
壯筋。與白馬莖同功。驢乳療黃痺。溼熱止渴。驢尿專  
於殺蟲。利水止脹。其治噎膈或單服。或入四物湯服。

之効。驢屎炒熨風腫漏瘡絞汁主心腹疼痛治水腫服五合良。

駝峯

甘溫無毒。

發明 駝峯八珍之一。味雖極美。但能動風。宿有風氣人勿食。駝脂摩風去頑皮死肌。取熱氣透肉也。

酪

甘平無毒。

發明 凡牛羊駝馬之乳。並可作酪。南人惟知熱酒冲食。北人必以熬熱冲茶漿服。大能清胃。不助溼熱。止煩解渴。除心膈熱悶。潤腸胃燥結。摩腫生精血。補。

虛損壯顏色。戴原禮云。乳酪血液之屬。血燥者宜食較之人乳尤勝。以其無怒火淫毒也。華元化云。蜨蟬入耳。以酪灌入。卽出。

酥

一名醍醐

甘寒利下無毒。酥酪不可與生魚膾同食。

令人腹內生蟲。

發明 酥酪醍醐性皆滑潤。故血熱枯燥之人咸宜用之。又傷熱失音。用以通聲最妙。凡灸一切氣血堅韌筋骨藥。俱不可少。但脾胃虛滑者禁用。

阿膠

甘平微溫無毒。辨真僞法。以頂有髮文極圓。

整者爲真。折之沉亮。不作屑。不作皮。臭蛤粉炒成珠。經月不軟者爲佳。東阿產者雖假。猶無妨害。其水膠人木煤質。造有傷脾氣。慎不可用。

本經主心腹內崩。勞極洒洒如瘡狀。腰腹痛。四肢酸疼。女子下血。安胎。久服輕身益氣。

發明 阿井水。淄水之源。色黑性輕。故能益肺補腎。煎用烏驢。必陽谷山中。驗其舌黑。其皮裏通黑者。用以熬膠。則能補血止血。本經治心腹內崩。下血安胎。爲諸失血要藥。勞證欬嗽喘急。肺痿肺癰。潤燥滋。

大腸治下痢便膿血所謂陰不足者補之以味也

黃明膠

膠卽廣

甘平無毒

發明 明膠治吐血衄血下血血淋血痢妊娠胎動下血風溼走注疼痛打撲傷湯火傷一切癰疽腫毒治血止痛潤燥利大小腸皆取其有滋益之功無滑利之患

牛黃

苦平小毒。試真假法。揩摩透甲其體輕氣香

置舌上先苦後甘。清涼透心者爲真。喝迫而得者名生神黃。圓滑外有血絲。嫩黃層多者爲上。殺後取者

其形雖圓下面必扁者次之在月中者名角黃心中剝得者名心黃膽中得之名膽黃則又次之產西戎者爲西黃產廣東者名廣黃

本經主驚癇寒熱熱盛狂癲陰邪逐鬼

發明 牛有黃是牛之病也因其病之在心及肝膽之間凝結成黃故還治心及肝膽之病本經治驚癇寒熱狂癲邪鬼皆痰熱所致其功長於清心化熱利痰涼驚安神辟惡故清心牛黃丸以之爲君其風中心藏者亦必用之若中經中府者誤用引邪深入如

油入麪莫之能出宜詳審而用可也

**狗寶** 甘苦溫小毒狀如白石微帶青色擊碎其理如蟲白臘者真

**發明** 狗寶專治噎膈反胃之病取苦能下降溫能開結也予嘗推廣其用凡癰疽潰瘍不收癲狂冷痰積結無不可用惟鬱結傷脾氣血枯槁者誤投則有負薪救火之厄

**獅油** 辛溫有毒色微黑者真

**發明** 獅爲百獸之長性最難馴一吼則百獸辟易

爾雅言其食虎豹熊太古言其乳入牛羊馬乳中皆化成水西域人捕得取其油入貢以供宮人滌除衣垢之用又能去紙上墨跡刮少許隔紙熨之卽脫予嘗試用垢雖去而衣易毀紙易脆僅供一時之用雖係方物方藥罕用近世醫師以之治噎膈病蓋噎膈皆鬱痰瘀積所致用取滌垢之意試之輒驗由是方家爭爲奇物但性最猛利力能墮胎孕婦忌用象油亦能去垢滌痰但不能去墨跡耳

**虎骨**

辛微熱無毒骨取黃潤者良若帶青黑色乃

藥箭射者有毒勿用酥炙黃脆用之。

發明 虎陰也風陽也虎金也風木也虎嘯風生木承金制陽出陰藏之義故骨能追風定痛強筋壯骨風病攣急骨節風毒爲之要藥虎之一身節節氣力皆出前足故膝脛爲勝而前左脛尤良以卧必用左脛爲枕也然按病之前後左右取用其効尤捷入陰陽二蹻虎睛定梟千金治狂邪有虎睛湯丸並酒浸炙乾用一時不可得以珍珠煨末代之總取定魄之用也虎脂治反胃吐食新瓦上煨存性入平胃散末。

和勻。空腹白湯服三錢。効。虎頭骨治頭風。藥中浸酒服。作枕止瘡。虎長牙辟邪殺蟲。傳尸方用之。

象皮

鹹溫無毒

發明 象秉西方金氣。金令主藏。不宜擅鳴。鳴主金象大非所宜。其皮專於收斂。其肉壅腫。人以斧刀刺之。半日卽合。故治金瘡不合者。用其皮煨存性敷之。若入長肉。諸膏藥切片酥拌炙之。象牙甘寒。能解癰腫諸毒。磨水服之。造筋磨礪之末。生蜜調塗。治諸鐵襍物入肉。舊梳刮薄片屑。溫湯頻服。治竹木刺及諸魚

骨鯁。卽時吐出。不吐再服。以吐出爲度。非刮下薄片。不能應手也。

犀角。苦微鹹。大寒無毒。鎔成以熱手掌摸之。香者爲真。臭者卽假。忌滴鹽。烏附。孕婦勿服。能消胎氣。

發明。犀之精靈。皆聚於角。足陽明胃爲水穀之海。飲食藥物必先受之。故犀角能涼血散血。及畜血驚狂。斑痘之證。皆取以通利陽明血結耳。別錄治傷寒溫疫。頭痛寒熱諸毒。抱朴子云。犀食百草之毒。及衆木之棘。所以能解毒。凡蠱毒之鄉。遇有飲食。以犀筋

攪之有毒則生白沫。無毒則否。宗奭曰。鹿取茸。犀取尖。其精銳之力盡在是也。其治吐血。衄血。大小便血。犀角地黃湯爲之專藥。若患久氣虛。又爲切禁。以其能耗散血氣也。痘瘡之血熱毒盛者。尤爲必需。然在六七日灌漿之時。又爲切禁。以其能化膿爲水也。而結疔後餘毒癰腫。則又不忌。惟氣虛毒盛之痘。切不可犯。其性大寒。無大熱邪者。慎不可用。凡中毒箭。以犀角刺瘡中立愈。又感山嵐瘴氣。射工溪毒。用生犀磨汁服之卽解。

熊脂

肉

甘溫無毒。

本經主風痺不仁筋急。五藏腹中積聚。寒熱羸瘦。頭  
瘍白禿。面上肝皰。

發明 熊稟雄毅之性。故其脂可開風痺不仁等疾。  
可服可摩。但不可作燈烟。氣薰目。使人不能遠視。本  
經所主。不出風痺筋急之用。風爲陽邪。熊爲陽獸。其  
性溫潤。能通行經絡。開通血氣也。熊筋亦能壯筋強  
力。與虎骨之搜風壯骨無異。熊肉振羸。其氣有餘。癩  
病人食之。終身不愈。

熊膽 苦寒無毒。試法取少許研滴水。中掛下如線。直至水底不散者爲真。

發明 熊膽苦入心。寒勝溼。手少陰足厥陰藥也。其性潔不染塵。故能清心平肝。爲時氣熱盛。變爲黃阻之要藥。又能殺蟲明目。除醫瘡疳痔。蟲牙。虻痛。小兒驚癇。癰癤。以竹瀝化豆大許服之。去心中涎。痔瘡赤腫。水化點之。卽消。凡實熱之證。用之咸宜。苟涉虛家。便當嚴禁。

臨羊角

卽羚羊角

鹹寒無毒。鎊碎胸前煨熟。令脆。研如

粉不則粘人腸胃。

本經主明目益氣。起陰去惡血。注下辟蠱毒惡鬼。不祥。厭邪。

發明 羚羊屬木入足厥陰。伐肝最捷。目暗腎障而羚羊角能平之。痘瘡正面稠密不能起發。而羚羊能分之。小兒驚癇。婦人子癇。大人中風搐搦及筋寒歷節痛。而羚羊角能舒之。驚駭不寧。狂越魘寐。而羚羊角能安之。惡鬼不祥。而羚羊角能辟之。惡血注下。蠱毒疔痛。瘡腫瘰癧。產後血氣。而羚羊角能散之。溼熱。

留滯陽氣不振。陰器衰痿。而羚羊角能起之。煩憊氣逆。噎塞不通。鬱爲寒熱。而羚羊角能降之。詳本經所主。皆取散厥陰血結耳。愚按諸角。皆能入肝散血解毒。而犀角爲之首推。以其專食百草之毒。兼走陽明力能祛之外出也。故痘瘡之血熱毒盛者。爲之必需。若痘瘡之毒。并在氣分。而正面稠密。不能起發者。又須羚羊角。以分解其勢。使惡血流於他處。此非犀角之所能也。人但知羚羊角能消目翳。定驚癇。而散痘瘡惡血之功。人所共昧。殺羊角治青盲目暗。與羚羊

角不殊而辟除邪魅蠱毒亦相彷彿惜乎從未之聞  
惟消乳癖丹方用之白羯羊角亦能消乳癖而方家  
每用琉璃角燈磁片刮取薄屑置胸中候脆杵細酒  
服方寸匙屢効專取宿腐之味以消陳積之殆也其  
鹿角刮屑善消虛人乳腫未潰卽消已潰卽斂卽本  
經主漏下惡血之治龍角治神魂不寧功用與龍齒  
畧同千金方中有齒角並用者牛角腮專主閉血血  
崩牛之一身惟此無用而本經特爲採錄千金尤爲  
崩漏要藥可見天地間無棄物也

山羊血

鹹溫無毒

苗人以麋竹通節削鋒利活刺心血收乾者良宰取者不用

發明

山羊產滇蜀諸山中性善走逐好鬪肉能療

冷勞山嵐瘧痢婦人赤白帶下其心血綱目失載性

溫味鹹爲和傷散血之神藥其治跌撲損傷單用酒

服取醉醉醒其骨白續每用不過分許不可多服雖

不傷耗元氣而力能走散陰血然必初患便服得効

最速若過三五日血凝氣滯無濟於治矣但舉世用

者絕罕間有收取而市者其價重等於牛黃且心血

絕不易得滲血丹用之真虛勞失血之續命丹也

鹿茸 甘溫無毒。形如茄子。色如瑪瑙者良。紫潤圓短者爲上。毛瘦枯縐尖長生岐者爲下。酥炙酒炙。各隨本方。但不可過焦。有傷氣血之性。炙後去頂骨用茸。

本經主漏下惡血。寒熱驚癇。益氣強志。生齒不老。發明 鹿是山獸屬陽。性淫而遊山。夏至得陰氣而解角。從陽退之象。麋是澤獸屬陰。性淫而遊澤。冬至得陽氣而解角。從陰退之象。鹿茸功用。專主傷中勞絕。腰痛羸瘦。取其補火助陽。生精益髓。強筋健骨。固

精攝便下元虛人頭旋眼黑皆宜用之本經治漏下惡血是陽虛不能統陰卽寒熱驚癇皆肝腎精血不足所致也角乃督脈所發督爲腎藏外垣外垣旣固腎氣內充命門相火不致妄動氣血精津得以凝聚扶陽固陰非他草木可比八味丸中加鹿茸五味子名十補丸爲峻補命門真元之專藥傳尸癆瘵脊中生蟲習習痒痛淅淅作聲者同生犀鼈甲入六味丸中其殺蟲之力與天靈蓋同功近世鹿茸與麋茸罕能辨別大抵其質粗壯而腦骨堅厚其毛蒼鰲而雜

白毛者爲麋茸。其形差瘦而腦骨差薄。其毛黃澤而無白毛者爲鹿茸。鹿茸補督脈之真陽。麋茸補督脈陰中之陽。不可不辯。

鹿角膠 甘微鹹溫無毒。河南者味甘溫爲上。泊上者味鹹辛爲下。又生取成對者力勝。解下單角力薄。凡角大而毛色淡白者卽爲麋角。能補陽中之陰。熬膠法。取角寸截。用長流水浸三日。刮淨。入黃蠟煮三日夜。乾卽添水。三日夜足。去角取汁。重煎滴水不化。膠成切片陰乾。不可日晒。晒則融化成水矣。今市者

多者黃明膠。加楮實。僞充。不可不察。取嫩角。寸截。置小罈中。酒水相和。盆蓋泥封。糠火煨。三伏時。搗細。如霜。名鹿角霜。

本經主傷中勞絕。腰痛羸瘦。補中益氣力。婦人血閉。無子。止痛安胎。久服輕身延年。

發明 鹿角生用。則散熱行血。消腫辟邪。熬膠則益陽補腎。強精活血。總不出通督脈。補命門之用。但膠力稍緩。不能如茸之力峻耳。互參二條經旨。乃知茸有交通陽維之功。膠有緣合衝任之用。然非助桂以

通其陽。不能除寒熱驚癇。非龜鹿二膠並用。不能達  
任而治羸瘦腰痛。非輔當歸地黃。不能引入衝脈。而  
治婦人血閉胎漏。至若膠治傷中絕勞。卽茸主漏下  
惡下也。膠之補中益氣力。卽茸之益氣強志也。膠之  
輕身延年。卽茸之生齒不老也。歷攷別錄外臺千金  
等方。散血解毒居多。非如近世。一溫補爲務。殊失  
聖賢一脈相傳之義。○鹿角霜治火不生土。脾胃虛  
寒。食少便溏。胃反嘔逆之疾。取溫中而不粘滯也。古  
方多製應用。今人每以煎過膠者代充。其膠旣去。服

之何益○生角鋸尖屑消乳癰腫毒○煨灰行崩中  
積血○鹿骨安胎下氣作酒主內虛續絕傷補骨除  
風千金鹿骨丹用之

鹿胎 甘溫無毒其嘴尾蹄合與生鹿無異者爲真  
其色淡形瘦者爲鹿胎若色深形肥者爲麋胎慎勿  
誤用能損真陽又獐胎與鹿胎相類但色皎白且其  
下脣不若鹿之長於上脣也其他雜獸之胎與鹿胎  
總不相似也入藥取真者酥炙黃用

發明 鹿性補陽益精男子真元不足者宜之不特

茸角莖胎入藥而全鹿丸合大劑參耆桂附大壯元陽其胎純陽未散宜爲補養天真滋益少火之良劑然須參耆河車輩佐之尤爲得力如平素虛寒下元不足者入六味丸中爲溫補精血之要藥而無桂附辛熱傷陰之患但慎勿悞用麋胎反傷天元陽氣也麋茸甘溫無毒修治與鹿茸同

發明 麋肉大寒食之令人陽痿而麋茸大益陽道以其陽精都聚於角也其角煎膠勝於鹿角茸亦勝於鹿茸然鹿之茸角補陽右腎精氣不足者宜之麋

之茸角補陰左腎血液不足者宜之此乃千古微旨  
治虛損有二至丸兩角並用但其藥性過溫偏於補  
陽非陰虛者所宜其麋膠主治與鹿膠無異而兼補  
陰血之功過於鹿膠但驗其角大而毛者卽是惜乎  
本經但言麋脂療癰腫惡瘡死肌寒熱溼痺四肢拘  
緩不收風頭腫氣通腠理從無及乎茸角之用彭簪  
延齡方有麋角粉千金變爲麋角丸以麋性喜食菖  
蒲故修鍊服食方用之金匱云麋脂及梅子若妊婦  
食之令子青盲男子傷精皆性冷傷厥陰肝經之驗

也。

麋鹿肉

麋肉甘寒。鹿肉甘溫無毒。

發明 凡獸之有角者皆能助肝腎膂力而麋鹿之角多岐。故力能拒虎爲角獸之冠。則鹿肉之補陽。麋肉之益陰。所不待言。鹿之一身所稟皆陽。最能益人。人以陽氣爲主也。麋之一身所稟皆陰。惟角爲陰中之陽。較之鹿角純陽無陰倍勝。而週身血肉筋骨皆不足取。鹿肉之生者主中風口僻不正。剉碎薄貼。僻上正急去之。不爾復牽向不僻處矣。○鹿血起陰器。

止腰痛療折傷和酒服治肺痿崩中諸氣刺痛飲之立愈鹿筋大壯筋骨食之令人不畏寒冷但須辨骨細者爲鹿粗者卽是麋筋誤食多致陰痿。凡服丹石藥人勿食鹿肉以其食百草之毒善解諸藥之性也。

麋 甘寒無毒。

發明 麋之性怯畏人以其膽白易驚也。其肉雖肥但能悅澤人面不能助人臂力以其善躍而無久常之力也。膽能治人粗豪之氣。若人素常膽怯者爲之。

切禁其骨主虛羸泄精。麝稟偏陰而骨主精氣也。綱  
目言其甘溫。安有膽白易驚而性甘溫之理。

麝臍 辛溫無毒。不可犯火。妊婦禁用。力能墮胎。今  
人以荔枝核燒灰入燒酒拌和充混。不可不察。  
本經辟惡氣殺鬼精物。去三蟲蠱毒。溫瘧驚癇。

發明 麝香辛溫芳烈。爲通關利竅之專藥。凡邪氣  
著人淹伏不起。則關竅閉塞。辛香走竄。自內達外。則  
毫毛骨節俱開。從此而出。故本經有辟惡氣殺鬼精  
物。去三蟲蠱毒諸治也。其主溫瘧驚癇者。借其氣以

達病所也。嚴氏言風病必先用麝香丹。溪謂風病必不可用。皆非通論。蓋麝香走竅入筋。能通筋竅之不利。開經絡之壅遏。若諸風諸氣諸血諸痛驚癇癰癢。諸病經絡壅閉。孔竅不利者。安得不用爲引導。以開之。通之。惟中風表證未除。而誤用之。引邪入犯。如油入麪。苗之能出。致成痼疾。爲之切戒。而救苦丹治壅腫結塊。方用硫黃辰砂入麝煇化。隔紙壓成薄片。以少許多患處。無不立應。濟生方治食瓜果成積作脹。及飲酒成消渴者。皆用之。蓋果得麝則壞。酒得麝則

敗此得用麝之理也

貓 甘酸溫無毒

發明 貓捕生鼠虎噉生人。大小雖異。稟性不殊。虎  
嘯風生。而治風痺腫痛。貓聲鼠竄。而主鼠瘻寒熱。故  
肘後方取貓肉作羹。消鼠竇結核。已潰未潰皆愈。但  
助溼發毒。有溼毒人忌之。其頭骨及腦眼酥炙亦治  
療癰鼠瘻。其毛煨存性。傳療癰潰爛。貓尿治蜥蜴入  
耳。滴入卽出。以薑擦貓鼻。或生葱刺鼻取之尿治痘  
瘡倒陷。臘月取乾者燒存性用之。貓胞治噎膈反胃。

以純陽之性未散故取以開陰邪之結也方用一具酥炙爲末入腦麝牛黃鬱金各少許津唾化服之予嘗以格致之理論物類。貓之體陽而用陰性稟陰賊機竊地支故其日夜視精明而隨時收放善跳躍而嗜腥生不熱食而能消化血肉生物一皆風火用事得雪水則蠢動以雪之體陰而用陽物類相感之應若此而食江中鱖魚之骨其胎必墮按異物志云鱖是鱸鳥所化故腹內尚有鳥腎二枚與雀入淮水爲蛤無異其肉中細骨如毛粘腸不脫而致傷胎物類

感觸之應則又如此。

狸 甘溫無毒。

發明 狸之與貓同類異種。以性溫散。故其骨炙灰。善開陰邪鬱結之氣。鼠瘦寒熱爲之專藥。千金以肉治遊風。蘇頌作臙治鼠瘻。元化取頭骨。千金用陰莖。總取攻毒破結之義。時珍曰。狸骨貓骨性皆相近。可通用之。

狼 肉 鹹熱無毒。

發明 狼脂摩風首推。而本草不錄。亦一欠事。狼肉

補五藏厚腸胃。填骨髓。有冷積人宜食。狼性追風逆行。故其矢燒烟。能逆風而上。燒灰水服。治骨鯁。以其性專逆行而無阻滯也。

兔 辛平無毒。妊娠忌食。兔肉合乾薑食之。成霍亂。發明 兔無脾。故善走。二月建卯。木位。木尅戊土。故無脾。其肉性寒。能治胃熱嘔逆。腸紅下血。其腦爲髓之精。性善滑胎。故兔腦丸爲催生首藥。然須臘月取。活兔用之始驗。兔肝明目。目屬肝。稟氣獨勝。且得至陰之精。可救日暗之疾。其尿謂明月沙。又名望月。

沙。治目中浮翳。痘瘡患眼。但瞳人無損者。用以煨灰存性。日日服之。其腎自退。又方。兔屎一味。爲末。生雞肝搗爛。爲丸。空腹穀精湯服之。腎厚加雞內金。尤捷。兼治勞瘵。五疳痔瘻。殺蟲解毒。黃帝曰。兔肉和獺肝食之。成遁尸。

狐陰莖 甘平有小毒。

發明 狐屬陰類。故其莖主女子絕產。陰中癢。小兒陰癰卵腫。以狐陰善縮入腹也。

水獺肝 甘鹹平小毒。

發明 獺者水獸。水性靈明。故其性亦多智詭。性專嗜魚。魚之生氣都聚於肝。是以獺肝專主傳尸癆瘵。殺蟲之性與獺之捕魚不殊。蘇頌曰。諸畜之肝皆有定數。惟獺一月一葉。十二葉間有退葉斗柄建寅之月。值其氣退之時。反爲諸魚所蝕。月令所謂獺祭魚是也。以其治療有驗。故仲景治冷勞有獺肝丸。崔氏治蠱症亦有獺肝丸。孟詵云。症病一門。悉患者以獺肝一具。火炙水服。方寸七日。再服之。葛洪言尸症乃五症之一。病則使人寒熱沉沉。默默不知病之所苦。

無處不惡。積月累年淹滯至死。死後復傳他人。乃至滅門。覺有此候。惟以獺肝一具。陰乾爲末。水服方寸匕。日三。以瘥爲度。如無獺肝。獺爪亦可應用。小兒鬼疰及諸魚骨鯁。皆燒灰酒服。獺肝之用。當不出乎此也。

山獺莖

甘熱無毒

發明 山獺稟南奧純陽之氣。故其性最媯。專主陽虛陰痿。精寒山中有此。凡牝獸皆避去。獺無偶。則抱木而枯。徭女春時入山。獺聞婦人氣。躍來抱合。牢不

可脫因扼殺而取之也

膈肭臍

一名海狗腎

鹹大熱無毒以漢椒樟腦同收則

不壞

發明和劑局方治諸虛損有膈肭臍丸滋陰丸藥  
中用之精不足者補之以味也今人多於房術方中  
用之亦可同糯米法麴釀酒服但功專補陽陰虛切  
忌此物牝者最多而牡者絕少海州人捕得牝者以  
家狗外腎用筋縫上熨貼如生成無二然牝戶與穀  
道連合爲一雖用生筋縫熨其孔較牡者大而且長

以此辨之最爲有據

**牡鼠** 甘溫無毒。取膽法用活鼠繫定。熱湯浸死。破喉取膽。真紅色者是也。誤食鼠噉之餘。令人發癯瘡。以貪慾之火蘊積饒涎也。

**發明** 癸水位在於子。通氣於腎。其日夜明其精在膽。故膽能治耳聾目盲。睛能明目。骨能生齒。皆益腎之驗。肘後方治三十年老聾。卒聾不過三度。卽愈。令人側卧。瀝膽汁入耳。盡膽一枚。須臾汁從下耳出。初時益聾。十日後乃瘥也。生鼠血。蘸青鹽擦牙。宣有效。

初生小鼠香油浸腐化。取塗火燙効。少水能制壯火也。若生毛則不能消融矣。牡鼠糞俗名兩頭尖。驗其直者方是牡鼠之矢。入足厥陰少陰故養服治傷寒勞復陰陽易腹痛。研末服治乳癰。燒灰存性。傳折傷疔腫。所主皆厥陰血分之病。又犬咬先洗去牙堊惡血。用鼠糞炒研黑糖調塗卽愈。

**猬皮** 苦平無毒。細剉炒黑或酥炙用。

本經主五痔陰蝕下血不止。陰腫痛引腰背。酒煮殺之。

發明 狷者胃之獸也。故肉治反胃胃脘痛最捷。其皮除目中翳障。本經主五痔陰蝕。取其銳利破血也。酒煮治陰腫痛引腰背。取筋脈能收縱也。南方金蠶。蠱用狷皮爲末。酒服探吐之。狷腦狷肝治瘰癧狼漏。千金方用之。但不可食其骨。令人瘦劣。

人部

髮 苦微溫無毒。揀去白者。先用滾水洗淨。入煑成罐。外用鹽泥固濟煨候。內外罐通紅冷定。研末置地。去火毒用。

本經主五癰關格不通利小便水道療小兒驚大人  
瘰仍自還神化。

發明 髮者血之餘故能治血病雖曰補真陰療驚  
癰聖欬嗽固崩帶止血暈而實消瘀生新能去心竅  
惡血並煨過服若煨之不透反能動血合雞子黃香  
油煎之消化爲水則治小兒胎驚及塗癩瘡有效用  
入膏藥中則長肉消瘀本經治五癰關格不通利小  
便水道皆取其利竅散瘀之功其療小兒驚大人瘰  
以能達肝心二經開通痰血之滯也仍自還神化者

言服自己之髮則勝用他人之髮也。但胃虛人勿用。以其能作嘔瀉也。亂髮功用與此不殊。而剝下者尤勝。取長之速也。小兒胎髮煨灰大解胎毒而補先天血氣。以純陽未離也。

頭垢 鹹苦溫小毒。

發明 頭垢乃相火之餘氣結成。專開鬱結之氣。乳癰初起。煨灰酒服卽消。以其善祛胃中積垢也。

人乳汁 甘鹹平無毒。

發明 乳汁治目之功甚捷。目得血而能視。乳卽血。

之源也。用以點眼，豈不相宜？老人服食尤良，但脾虛易瀉者，勿食。日中曝乾，入參苓丸服，尤爲合宜。

爪甲

甘鹹小毒

發明 爪乃肝氣之餘，其性銳利，故能催生下胞衣。利小便，治尿血及陰陽易病，破傷風，去目翳，刮末治鼻衄，嚙之立止。又能治乳蛾，用爪指甲不拘多少，煨爲末，蓬砂白礬各一錢，西牛黃一分，烏梅白梅肉各五枚，共搗如泥，含彈大一丸，痰大湧出三四丸，卽愈。但其方酸收太速，不無萌發之患，莫若探吐頑痰，迅

掃病根爲愈

人牙

甘鹹熱有毒

發明 牙乃腎之標骨之餘。痘瘡倒靨。用人牙散。因痘瘡爲風寒穢氣所觸。而變黑倒靨。用此煨灰。以酒磨達之。竄入腎經。發出毒氣。乃劫劑也。若伏熱在心。昏冒不省人事。及氣虛色白。癢塌不能作膿。熱癰紫泡之證。正宜涼血解毒。苟誤用之。則鬱悶聲啞。反成不救。臨證審諸。

人中黃

甘鹹寒無毒。造法用大竹截段兩頭留節。

削去外皮。傍鑽一孔。用甘草細末入滿於中。以蕉扇柄削圓塞孔。冬至浸大糞池內。立春後取出。懸風處。眠乾取用。又法如前製竹。不入甘草。但用蕉扇柄或杉木塞孔。浸糞池中。以取其汁。與金汁無異。僅供一時取用。不能久藏。糞清亦解瘟熱諸毒。又悞食毒菌。楓樹上菌。及過食銀杏。脹閉欲死者。悉能解之。并解砒石野葛野芋等毒。卽家芋三年不收。花開如蓮者。亦能殺人。急取灌吐。方可得生。

發明 人中黃取糞土之精。以解天行狂熱溫毒發

斑最捷然汁則性速而能下泄甘草製者則性緩而能解毒兼治河豚菌毒一切惡瘡災病用人中黃酒大黃末等分無灰酒服須臾瀉利毒卽隨出雖大渴不可飲水飲水則毒邪不散而難救也急切不可得。以糞坑塹代之。

金汁 苦寒無毒臘月取糞置罈中埋土內越三年取出如水者是。

發明 金汁得土氣最久大解熱毒故溫熱時行昏熱勢劇者用以灌之下咽其勢立減初生小兒週時

內毒邪不散服一二合勝化毒丹胎毒盡解無痘疹患此屢驗者但胎稟虛寒體瘦色白者不可誤用誤用反奪天真多致夭枉不可不審園叟用以灌諸草木卽花葉茂盛且無過壅傷花之患

乾糞灰 鹹平無毒

發明 人尿取乾者煨灰治小兒痘瘡黑陷解時行大熱狂走蜜調塗疔腫拔毒出根總取解毒之迅耳  
溺 鹹寒無毒童子者佳不可見火見火則腥臊難服

發明

人溺療寒熱頭疼取其鹹寒降泄也。有客邪。

冲熱葱頭湯服之。汗出即止。而童子小便性純。一切  
熱勞吐血。陰虛火動。骨蒸勞瘵。用以降火最速。產後  
血暈溫飲一杯。壓下敗血惡物。卽穌。蓋洩溺滋陰降  
火消瘀血。止吐衄諸血。每用盞許。入薑汁一二匙。徐  
徐服之。久自有效。然須乘熱服之。以接生陽之氣。冷  
則生氣散矣。時珍云。童便入胃。隨脾氣上歸於肺。通  
調水道。下輸膀胱。乃其舊路也。故能清肺導火下行。  
若多服久服。亦能損胃滑腸。故食少便溏者。禁用傷。

寒少陰證下利不止厥逆無脈乾嘔欲飲水者加人尿豬膽汁鹹苦寒物於白通湯薑附藥中其氣相從可無格拒之患但胃虛欲作嘔者勿與恐助嘔勢反致不測也

溺白堊

卽人中白

鹹平無毒。煅過用。

發明 人中白能瀉肝火膀胱火從小便中出蓋膀胱乃其故道也。今人病口舌諸瘡用之有效降火之驗也。但積垢之滓僅堪滌熱畧無益陰之功耳。

秋石

鹹溫無毒陰煉。秋石法將大缸一隻近底

三寸許。又火燒三十餘炷。打成一孔。杉木塞之。秋月取童子溺入缸內。衝河水攪澄定。去木塞。放去上水。每日增童便河水如前攪之。只留缸底者。積至月餘。用絹篩襯紙瀝乾收之。又陰收秋石法。將鉛毬大小數十枚。俱兩片合成。多鑽孔眼。入尿桶中浸。每日傾去宿尿。換溺浸之。經秋收取。置鉛罐藏之。此爲最勝。○陽煉秋石。將草鞋數百隻。舊者尤佳。長流水漂晒七日。去黃色。浸尿桶中。日晒夜浸。一月許。曝乾。烈日中燒灰。須頻挑撥。令燒盡。滾湯淋汁。澄數日。鍋內

燒乾重加雨水煮溶。笈篲初紙數重。濾淨再澄。半月  
餘。銀缶器內煮乾。色白如霜。鉛罐收之。又陽煉法。  
以童子小便入鍋熬乾。其鍋先燒通紅。香油熬過洗  
淨。則不粘滯傷鍋。初如油脚。入煬成罐。或小鐵釜中。  
煨通紅。用熱水溶化。置有嘴壺中。將草掩塞壺口。徐  
徐傾出。下以竹篲襯紙濾清。再以文火收乾。鉛罐收  
之。則不溶化。又凝秋冰法。以秋石入秋露水煮化。  
入陽成罐內。新鐵蓋蓋定。鹽泥固濟。昇打三炷香。取  
出再研如前。昇打蓋內用水徐徐塗之。水不可多多。

則不結又不可少。少則不昇。從辰至未。退火冷定。蓋  
上。升起者爲秋冰。乃秋石之精英。真虛羸之神丹也。  
○凡人力製造之藥。每多僞充。而秋石之真者尤不  
易得。有以食鹽濾水煮成者。有以朴硝溶化製造者。  
有以焰硝煏化傾成錠式者。其僞不一。苟非僱庸督  
製。總難輕用也。試真僞法。入滾豆腐漿中。不結腐花  
者爲真。若結者卽鹽之僞充也。入口令人作渴。入滾  
豆腐漿中。起水紋而微苦者。卽玄明粉之僞充也。入  
腹令人作瀉。其傾成錠式。入熱水不易化者。卽焰硝

之僞充也。下咽令人發熱。又以秋石化水入青菜葉。有頃色不萎者爲真。又以少許入眼不澀痛者必真。無疑。其淡秋石入滾水不化者卽熟石膏末。及滑石末混充也。

發明 秋石以秋命名。專取秋氣下降之意。他時製者。功力則殊。製法以童溺煅煉。去其鹹寒。轉成溫補。能滋陰降火。而不傷胃。補益下元真火。散瘀血。助陰精。降邪火。歸真陽。止虛熱。嗽血。骨蒸。勞瘵之仙品也。火盛者宜生宜淡。陰虛者宜熟宜鹹。凡勞瘵陰火亢。

極而不受參耆補益者。立秋石丸。三方次第施治。或服或噙。則喘欬氣息漸平。痰亦易出。嗽亦省力。以其性味鹹降。而無上逆之患也。先用韭汁炒黑大黃。淨末與秋石等分。煮紅棗肉爲丸。空心服三錢。清熱散血。次用貝母秋石末各等分。生甘草末減半。仍用紅棗肉爲丸。服之以止嗽消痰。後用人參秋石等分。炙甘草末減半。亦棗肉丸。以補氣安神。製劑之多少。隨癆熱元氣而施。不可限以分兩。其陰煉淡者。性最下。滲苟非陰分熱極。難以輕投。陰虛多火。小便頻數。精

氣不固者誤服令人小便不禁甚則令人夢泄其鹹者可代鹽。薰物食之。喘欬煩渴不得寐者。以半錢匙衝開水服之。卽得安寐。覺時滿口生津。亦不作渴。補陰之功可知。陰煉淡秋石。治夏暑熱淋。小便不通。及濁淋沙石淋。肉淋。老人絕慾太早。小便淋瀝。瀉痛。一服卽効。

紅鉛 鹹大溫無毒。卽室女初通經。水中之結塊。如櫻桃者是也。

發明 紅鉛流穢之餘。其性大熱峻補。命門淫火。陳

酒服一枚少頃蒙昧如醉若連服二枚則邪火內拒  
令人暴亡壯火食氣之驗也。

天靈蓋 鹹溫小毒制法以香水滌淨酥炙忤細入  
藥或煎酒或煨末隨證取用忌鐵器。

發明 腦爲髓海諸陽之會能辟一切陰邪不正之  
氣故曰天靈。凡人身中氣血安和諸邪不能侵犯陰  
陽乖戾則屍疰之氣得以乘虛襲入是卽瘵蟲之根  
氣也若其人平昔陽衰則蟲攻脊脈脊中淫淫作癢  
隱隱作痛轉側不能自安或時凜凜畏寒或時翕翕

發熱手足四末常清脈來弦細乏力非天靈蓋散不能療之若其人素稟陰虛則蟲蝕藏府胸中嘈雜如饑默默不知所苦無處不苦動則時欬時嘔靜則善寐善忘而上忽時哄熱脈多弦勁搏指此屬獼肝丸證非天靈之所宜其天靈散方用灸淨三指大一片赤檳榔三枚白甘遂麝香真安息各三分阿魏二分辰砂一分擣羅爲散桃枝煎湯五更調進一服約人行十里頃蟲不下再進一服天明進第三服取下蟲物急掄入油鐺熬之其蟲嘴黃赤者可卜病人血氣

未艾治之可愈。青黑白者血氣已竭。治之難已。然亦得斷傳染之患。凡修合勿令病人知。擇僻淨處。忌雞犬婦人孝服者見。蟲下後忌肥鮮及鹽半月。白粥調養漸安。如病久不勝。甘遂阿魏等攻逐。只以天靈蓋香水滌淨。仰置銀缶內。盛以醇酒。隔水煮一官香。酒耗旋添。候一炷香足。取酒服之。少頃頭旋顛。脹癢蟲隨嘔吐出。卽以燼火燎之。將養三日。後取前蓋骨製服如前。蟲盡卽以蓋骨仍埋舊處。其炙淨細末。并治小兒痘瘡。灰白陷伏不長。煩躁不寧。酒服四五分。

卽起然皆不得已而用之。至於傳下部疳入枯痔散。乃以人之至高之骨。置之汚下不潔之處。雖極其神驗。殊非仁人君子之用心。舍此豈無他藥可治乎。

人胞

卽紫河車

甘鹹溫無毒。取厚小色鮮者。挑去血絡。

漂淨血水。入椒一握。沸湯泡去腥水。以蜂蜜和長流水。於舊錫器內。隔水文火煮爛如糜。綿絞去滓。代蜜糊丸。藥良。

發明 紫河車稟受精血結孕之餘液。得母之氣血居多。故能峻補營血。用以治骨蒸羸瘦。喘嗽虛勞之

疾是補之以味也。自丹溪極言其功。而吳球創大造丸。雖世所推重。然方中生地黃。蘗天冬。麥冬。龜版。一派滋膩。傷胃之品。雖有人參一味。反助邪陰之勢。服之每致傷中。嘔泄未見其可。惟永類鈴方河車丸方。用人胞一只。山藥二兩。人參一兩。茯苓五錢。酒糊爲丸。近世改用鮮者。隔水煮搗作丸。尤爲得力。卽虛人服之。未嘗傷犯胃氣。

**胞衣水** 鹹潤微涼。無毒。臘月取紫河車。置有蓋瓦罐內。深埋土中。臨用取出。不可留久久。卽乾矣。或與

生甘草草末同入罐中埋於土中三五年後掘出卽爲藥也

發明 胞衣之性本熱而得土氣之化善能攝火歸元小兒丹毒諸熱毒發寒熱不歇狂言妄語頭上無辜髮豎虛痞等證天行熱疾咽痛及虛勞咽痛飲之立効反胃久病飲一鍾當有蟲出

### 初生臍帶

發明 臍帶者人之命帶也用以煨末入硃砂少許蜜水調服以解本嬰之胎毒與內傷之用骨灰無異

胎元

藏大溫小壽。

發明

胎元雖墮下胎息。淫火未離。天真未剖。較河

車之性。倍甚。古方鮮用。惟金剛丸用之。雖以人補人。

然獸相食。且人惡之。況人食人。能無惻怛之念乎。

本經逢原卷之四終